

楚

辭

集

丙



05367

苑洛集卷之五

大明趙太淑人墓誌銘



太淑人贈中大夫太僕卿直菴趙公之配總督宣  
大山西偏保諸鎮軍餉戶部右侍郎兼都察院右  
僉都御史公之母也既卒兼公訃聞于

上曰臣母荷

國厚

恩封太淑人今歿矣文階三品

國有常經臣今泣血以

請

卷五

上稽顙公咨勞報以全

制遣官

諭祭

錫緼調庸以營葬事開壙之期郡守身至陳牲奠桂  
詔相秉冊儀采彬彬於是吊者賙者四方來觀者  
萬夫塞道四田成蹊識士者父嘖嘖稱嘆謂太淑  
人賢謂兼公名德上非濫

錫下宜榮有也初兼公近侍遠鎮駁歷兩京太淑人  
皆從祿養歲壬寅北虜蹂我晉陽欲窺畿甸

天子震怒命將薄伐

簡蕙公督軍餉時太淑人偶感風疾然兵革也義弗  
得辭冒險又不可恐震驚乃奉歸開屬第姪侍湯  
藥甫歷夏秋而太淑人已報辭堂矣蕙公追念二  
十年來婉愉莊栗朝夕嚶嚶忽焉及此悲傷痛恨  
志不懷生及

恩命存渥光賁泉壤乃知忠孝蕙得揚顯為終其緒  
始少慰云太淑人姓張氏其先河南項城人曾祖  
均博通經史鄉試中式訓導開州遂籍于開今開  
之士盛于甲科者本訓導敷教之力也訓導公二  
子哲進士監察御史著舉人邳縣令邳縣太淑人

卷五

一

二

祖也父勲一鄉善士母陳孺人以內德稱惟生太  
淑人性穎慧溫貞精女工通列女傳大義父母愛  
甚冰氏踵門不輕許曰是兒非有福人弗能偶也  
乃擇字直菴公蓋時直菴公父中大夫贈公崇尚  
義氣鄉閭敬憚故善士結二姓之好云比太淑人  
歸趙氏贈公及配張淑人皆謝世太淑人恒以不  
獲事舅姑為歎繼姑樊孺人四子俱幼太淑人委  
曲承順凡覬紉悉出其手樊大安悅直菴公性嚴  
急又好賓客倉卒治具豐腆潔備直菴公每督蕙  
公兄弟讀書至分夜太淑人亦不寢直菴公綜理

家務日夕勞瘁太淑人譬之曰家頗裕諸子中必有穎拔者與何自苦爾直菴公曰吾豈僮僮不叩自恤哉凡所以爲諸弟也然汝言亦大是待婢僕以寬雖大失悞未嘗惡聲叱罵禮答姻黨崇戚每及儀物故內外愛敬之甲申

朝廷上

兩宮徽號以兼公給事中封孺人後兼公進位通政迎養京邸直菴公病太淑人躬進湯藥敬事若年少時直菴公歿痛哭輒弗止兼公兄弟泣勸則曰我未亡人何能自顧也丙申

卷五

三

大慶覃恩以兼公太僕卿封太淑人兼公撫陝每當出視事太淑人輒戒之曰汝勿乘怒過鞭撻吏民吾甚懼此久之秦人皆知兼公之仁出自內教初兼公迎養每歲時稱觴爲壽太淑人必曰汝其盡心所事吾母子蒙

恩已足矣及兼公晉陽之別倥忽疾病間猶以忠勸勉之且令勿以已爲念但云邊事寧當速回耳太淑人既丁趙氏富有顧內政益嚴朝夕弗怠簪珥服用靡事華耀及兩膺

大典龍章疊晉命服輝煌而勤懇儉素終始不渝云

夫富而無驕賢者所難知足不辱古今誦說太淑人富且貴矣而不忘勤儉至以忠勤勉兼公自謂已足是豈尋常女德哉世以男子弗能自拔者目爲婦人然則太淑人得不謂之女中丈夫哉太淑人生于成化癸巳五月十五日卒于嘉靖癸卯九月十八日享年七十一歲子男三長即兼公諱廷瑞正德辛巳進士七命歷今官內治外擲功在

國史茲不附書配孫氏爰封淑人次廷璋官生兼公以其廕讓娶郭氏次廷瓚陰陽典術娶李氏孫男四長栗國子生次果次木次葉孫女四一適王三

卷五

四

命一適王三重一字孫庚一幼未字曾孫女一幼未字以嘉靖二十四年正月八日啓直菴公龍河新阡之兆合葬焉前給事中今人官至事傅君學禮兼公舊僚也以狀來問銘銘曰於太淑人維閨之秀靜女閒閒君子是始治爾官事柔嘉有儀廟祀斯嚴百福來茲於太淑人維女之英豈曰婦德君子之行孰富而儉孰貴而勤惟我知足誨子忠仁子德孔那撫我秦中內修外擲既秦膚功子德令昭萬夫之望維

國楨幹太淑人慶寧碑我我蟠螭走鼉煌煌

宸翰玉鑿瑣磨昔也不遑其苦如岑今茲

恩榮始慰子心惟開有支坦坦而來其平如掌中藏  
乳胎吉匪四獸祥豈萬馬元吉百祥惟有德者溫  
溫淑德鬱鬱桂城我勒斯銘斯銘稱情

大明間太安人墓誌銘

太安人崑陽隱君子解公之女贈主事間公滋之  
配戶部主事仲字之母也嘉靖十一年十一月二  
十三日以疾卒狀云太安人生於某年某仲字將  
啓贈公之壙而合葬焉奉狀問銘夫女德之治尚  
矣間氏代之大家也間世中衰矣及贈公之身其

卷五

五

興也勃然太安人修內之勞也惟太安人靜一其  
德婉婉其質少而歸焉狀云歸時宜其家人承贈  
公之嚴也而委順之終其身無輻脫也必敬無依  
遂也以貞示從也其於翁姑也狀云翁媿壽公曲  
姑楊太孺人

養無方焉事生也致哀以禮焉事死也故諸婦式  
焉靈神祐焉狀云太安人得奇疾遇異昭孝也濟  
人而愈人以齋敬感所致

濟乎三男之成器而命之愛而教之寬也農春也

賈宇也學得其養而膺其榮狀云庚寅國丘城  
主事君貴推恩封

太安致慈也難乎二女同居而志不同行也啜次

於家人恕其非意而先其勞妯娌懷之分其績刺

而體其情小姑愛之怡怡乎以讓以親敦睦也察  
雞豚而孕字之料核蔬而樹蕪乏納酒漿而儲備

之賓客之供足矣翁夫之好得矣狀云翁及贈飲  
俱好賓客嗜飲

太安人精於制造善於存蓄  
蔬果酒肴皆預處之著理也若夫折而合

焉狀云翁姑以家口衆大命異產  
太安人親睦既久不忍折也族黨之婚喪而

資給焉鄉閭之災患而賑恤焉浴而發治命死而

安焉狀云太安人病起  
沐浴更衣乃就善斯丈夫之鮮能而君子之

所尚也其賢矣乎夫男女天地之大義也成於交

愛而毀於晨鳴狀稱閭氏之興太安人之勞也不

其然乎信女德之治尚矣銘曰太安人子男三長

卷五

仲寬娶康氏繼李氏次仲春娶劉氏繼樊氏次仲

宇娶丁氏繼冀氏方氏俱封安人女四長適霍子

秀次適汪鰲次適謝治次適知州董槐孫男七鏜

娶黃氏銅娶張氏鈞娶王氏固娶趙氏邦娶趙氏

立娶蔣氏位娶馬氏女四一適生員宋國卿一適

趙汝翼一適李基一適李三省曾孫五繼先紹先

繼元喜兒保兒曾孫女三葬之期嘉靖十二年十

月初十日也維代之陽有崇其崗蜿蜒俯馴鬱鬱

鬱蒼蒼楷形止生太安人之藏子孫繩繩保此

無疆

大明通議大夫兵部左侍郎贈都察院右都  
御史潘公墓誌銘

嘉靖戊申七月初五日公卒己酉大宗伯以祭葬  
請

上曰如制大冢宰以贈官請

上曰潘珍准贈都察院右都御史時

朝廷方嚴卹典三品官兼得者鮮以公名德祭葬贈  
官均錫云公姓潘氏諱珍字玉卿蘊玉之華也初  
號曰朴菴氏山有峩峩也故又曰峩峩氏以峩之  
碧也歸田後故又曰碧峩氏峩有兩也故又曰兩

卷五

七

峩氏晚而退以卑牧曰益以拙叟云潘氏之先姬  
姓周畢公之子季孫食采於潘因為氏後服租傭  
閩之三山唐廣明間逢辰公者憫時之亂上書闕  
下亟言時事不報隱于歛之黃墩遷于婺源之桃  
溪是為桃溪潘氏四世至初公七歲不言一日母  
携之登樓忽朗吟一絕家人驚異及長識趣異常  
大度好施人呼為謫仙云初公生汝翼公宋紹興  
進士官至秘校秘校生松年公登第官洪州錄事  
叅軍叅軍生宣議公文汶生奉議公執禮執禮生  
涇公紹定間選郡馬郡馬生崇龍公崇龍公生廷

璧公淮西安撫計議值宋亡元興誓不仕守東陵  
之節教子孫耕讀廷璧公生克勉公無子以兄子  
侑公嗣侑公生虎公虎公生勤才公配張氏生坦  
公字循理號閒菴敦尚仁厚鄉稱長者配張氏勤  
才公及閒菴公皆以公貴贈通議大夫兵部左待  
郎二張皆贈淑人張妣淑人夢五色鳥投于懷公  
生七歲就外傳勤勉敦朴不類群兒閒菴封公甚  
愛之爲廣延名師躬督課業甫弱冠克縣附學生  
提學歲試愛其文取魁縣士戊午中式壬戌登康  
海榜進士授浙江紹興府諸暨縣知縣政務循良

卷五

八

不事苛矯創建預備倉扁其門曰養惠更拓養濟  
院名其巷曰先斯新孔子廟程力計工民不知勞  
以治行徵拜大理寺左評事初公尹諸暨迎養閒  
菴封公不肯行報書曰吾豈能以朝夕盤飧遂舍  
山林之趣哉汝當務顯揚亦勿若曾元脣脣於口  
體也又曰民命至重汝勿誤於庶獄故諸暨之治  
膏澤爲多云陞左寺副考滿廷尉西臺政府咸以  
明敏允克署其實於是閒菴封公封如公官張妣  
封孺人陞左寺正尋陞山東按察司僉事時劇寇  
劉六等流劫東郡公分巡東充駐兗州整擷民兵

護衛

親藩賊猝至城下攻東門不得入乃去大掠曲阜公奏曰徒縣築城而曲阜始寧明年更巡海右都司某多內援怙勢侵削軍士怨苦公廉訪獲狀按治抵法一道肅然更巡東兗再更遼東東寧陸本司副使巡察海道而遼東撫按以公巡東寧稱也奏以副使仍巡東寧吏部報曰有

成命矣時沿海衛倉官攢滿待勘吏緣爲奸查駁至四五年典衣鬻子有墮身者公爲立法不再勘死者厚恤之會丁閒菴封公憂服闋起巡福建海道

卷五

九

捕擒劇寇三百餘有白金紵絲之

賜括民間私造大船可浮海者賞給水寨禁弗得再造而奸源塞矣陞山東按察使公凡三任山東施澤既久人心信愛稱爲潘青天云陞湖廣右布政使尋轉左時巨璫差脩承天

皇陵供費甚侈公量司帑所蓄既汰其三之二復分派隣省及取九江料銀協濟而湖民之困以舒湖賦王祿爲重近富之屬率賂脫顧派取遠貧下邑既劑量不平又多逋欠公隨地所宜而賦之民皆稱便陞右副都御史巡撫遼東贊理軍務公築邊

墻繕城堡濬壕斬清屯田廣積蓄利器械內修大  
備明年乞休不許丁張淑人憂服闋改南京右副  
都御史提督操江乃教造蜈蚣船及八槳船皆迅  
速如飛追賊無弗及者擒斬番賊徐勳等獲其番  
物輸之官尋陞南京兵部右侍郎召入兵部改左  
適安南請討莫登庸

廷議遣將提兵問罪公抗疏言北虜陸梁邊烽屢警  
宜備北虜以急不可懷之強寇安南遠裔又本陳  
氏故土黎氏篡之今莫氏復篡之禍亂相仍夷方  
常事宜先遣使諭以禍福如其款服則順而撫之

卷五

降封受職以奠南荒未可遽勒王師

廷議以成命既下不宜撓阻罷公閒住後師至南中  
凡處一如公言而安南平於是南臺合意乞還公  
官不報會遇

恩詔公獲致仕是後大臣撫按多薦起公將大用公  
而公卒矣公生于成化丁酉五月二十六日距卒  
享年七十有二公居常恂恂不事奇峻及臨大利  
害則英發堅定確乎不可奪學務自得不爲口耳  
動止迂怪之習才抱浚明而遇事慄慄勤勉不敢  
自遐自忽可謂亂而敬擾而毅愿而恭矣家食十

年餘優游自適即星溪之北建四美亭即柳溪之  
南建休休亭約邑老爲壽朋會歡娛笑語脫略城  
府若無廟廊之貴者鄉後生仰而式之公自筮仕  
至里居大臣撫按科道連篇累牘薦者三十餘章  
或見其才或見其節或見其學政或見其文章皆  
極華褒夫當官而薦是其常也若里居非清德重  
望冠士倫者不得與然則公身雖未得大行而道  
則亨矣公所著舉業有珍珠集奏稿有愚衷錄省  
愆錄詩文有兩峯存稿年紀錄榮樂集三錫錄世  
業錄凡若干卷藏于家配張淑人柔嘉閑淑且明

卷五

十一

知若學士自公歷官中外裨助者多非特爲內式  
也先三歲卒內行備載慈德錄中公已自爲誌納  
之壙矣子男二長即整鄉貢進士母病則刲股歿  
則廬墓娶汪氏次曰鑾補廕國子生娶王氏女一  
京王適戴緋孫男榮未聘女二桂英元英未字整  
等將以是年冬十月啓張淑人之壙合葬焉搢讓  
溪游公之狀來問銘銘曰維嘉靖己酉公變於桃  
溪之新阡有山負泉有水之玄騰萬馬於後懷萬  
寶於前鐫穹碑兮于雲蟠雙龍兮

天章郡侯承

命兮駭奔陳犧牲兮明堂罔玄薰兮瓊組奠桂酒  
兮椒漿於維休哉公之勲蹟銘弗克殫著其赫奕  
有莫篡黎

廷議詰兵公獨抗疏謂不宜征乃奪公官道則愈亨  
終用公言安南乃平公謂北虜勢漸桀強宜急為  
備以振邊疆使遠猷之見售無太原之殘傷於維  
那哉公言之昌用之有效違則弗祥赫赫明明

皇祖大訓胡戎戰爭備之宜慎安南限隔僻在一方  
彼不為患無倚富強至哉

皇言公敢對揚公之忠誠寔昭

卷五

十一

國是我勒斯銘用告太史豈告太史以式臣子

大明鄉進士趙子春墓誌銘

嗚呼傷哉吾子春乃遽至是邪子春將屬續屬其  
友張省試子靜曰芳也受學於苑洛先生佩訓茲  
終身焉必先生銘我墓芳也將服勤於地下矣子  
靜以狀來告銘噫吾尚忍銘吾子春邪吾忍不銘  
之邪銘之乎吾心割矣然吾不銘欲將孰銘也嗚  
呼傷哉吾子春倜儻豪邁而勅禮教明達聰碩而  
正節槩剛倨強毅而服忍讓文章彬彬然對如也  
使乎南征之志遂而其浚明之績又可量乎而乃

遽至是耶卒之時母且八十而子垂髫此子春倦  
倦不盡之痛恨也萬人皆涕淚矣嗚呼傷哉子春  
姓趙氏諱芳字子春別號左輔陝西西安同之朝  
邑箔子村人也趙氏之先本長安人高祖益避元  
亂始來箔子村曾祖讓業農弗仕祖謹以國子生  
歷利津丘縣簿五十致仕百歲乃卒封兵馬指揮  
鄉士大夫太崇敬之曰趙老先生祖妣陳封孺人  
老先生豁達有遠識治利丘聲稱卓然父璜兵馬  
指揮封文林郎母陳封孺人有內德京畿多豪右  
正德中爲尤甚文林明敏執法人甚憚之方以治

卷五

十二

行進官而文林卒矣子春始學於渭北趙知郡渭  
北一見稱之曰之子也眉間數寸瞳子精明質豐  
而氣清君子之流歟親愛之有異聞焉正德丙子  
苑洛子之家食也子春執義經而問焉苑洛子授  
以否泰二卦子春曰乾與坤消長之間欲整頓耶  
未濟既濟之相交其後乎非芳也之急苑洛子奇  
之曰是可以言進退存亡之道矣遂乎著本義詳  
說二十六卷以授之俾誦習焉嘉靖乙酉領省薦  
累試春官弗第戊戌又弗第過晉陽謁苑洛子苑

洛子曰子今強仕文如子學如子大科弗第天也  
子春曰寬以居之悠久成物春官之首命也先生  
嘗特授芳也弗習人也天曷故焉歸將詳服先生  
之教期驗於來春矣歸之五月而病又二月而篤  
乃顧其兄管曰死生常理也母老而弗能事子幼  
而弗能教死不瞑目也既而曰母老兄能事之子  
幼兄能教之遂卒子春性孝第事文林陳孺人終  
身不違顏色事兄蘭及莒甚恭貧時嘗脫內子之  
簪珥醫蘭之目而日以明族人死無棺槨者於  
我殯配楊氏一子世瞻娶許氏二女長安順字謝

卷五

十四

氏次安貞字徐氏子春生于弘治己未十月十八  
日卒於嘉靖十八年十一月二十四日得年四十  
嗚呼子春吾見其生也吾見其成也乃吾又見其  
死也傷哉蘭莒將於己亥二月七日葬子春於先  
塋之次銘曰維沙之苑維渭之陽中有美人如圭  
如璋有郁其文有成其行嗟嗟子春士林之望孰  
富爾有孰促爾亡天不可問冥冥蒼蒼嗚呼傷哉  
嗚呼傷哉

大明中順大夫四川夔州府知府劉公德徵

墓誌銘

德徵余友也別且十三年矣今歲再過定州而德徵已卧病執余手曰堪兒爲我教之茲與君永訣焉余心知其不起也姑寬慰之出而泣下比余至京師而堪持狀來問墓銘矣嗚呼傷哉德徵姓劉氏諱文煥別號蘭村德徵其字也亦字子緯劉氏之先蓋世爲山西懷仁人祖忠應戎大同中護衛求樂初調定州衛遂爲定州衛人父傑嫡母黃氏生母王氏以德徵貴傑贈承德郎兵部主事黃氏王氏贈太安人云德徵生而哲靈蓋六七歲善爲音對諸音字輒善省識之里中有本溥進士者蓋

卷五

十五

稱精鑑一見器異之曰是非尋常兒也以女字之弱冠進學官弟子提學陳公試其文大賞之曰劉生天下士也於是劉生聲稱籍甚畿內士無不推先劉生者蓋提學陳公延譽之力也正德丁卯鄉試中式明年登進士第授駕部主事蓋隸大司馬大司馬乃數數對衆稱說主事時朝邑韓邦奇爲選部員外郎長安劉公瓚爲大司徒蓋皆善大家宰相與推薦之曰主事當吏部德徵聞知亟抵員外郎曰天下豈少才文煥何以得此員外郎曰主事賢德徵曰員外郎以主事賢竊恐天下以爲員

外郎私也員外郎文煥友大司徒文煥戚主事苟  
賢柰何天下無知者獨其友與戚知之何也乃推  
他主事其後又有辭御史事蓋

天子用大家宰議選內外諸司明習國家事著聲名  
者充御史冢宰獨責之員外郎蓋薦四十人皆時  
俊德徵預焉員外郎意德徵且來辭避不見德徵  
窘甚夜排闥入扣牖呼曰文煥今日辭御史非前  
日辭吏部意也文煥生未啐而王母死黃母育成  
瘁甚矣今老且衰可為御史遠巡耶員外郎矍然  
起曰邦奇不知其不便如此事遂寢會黃大安人

卷五

十六

卒守制去服闋補客部遷儀部員外郎進客部郎  
中再調駕部大司馬每條奏議下諸部未能言郎  
中盡為之對大司馬悅之曰若郎中數十輩天下  
事豈足辨哉蓋諸部自以能不如郎中而郎中日  
益親重於大司馬乃擢東昌府知府時大將軍彬  
導

天子南巡江漢蓋彬日侍帷幄一切奏白盡從之貴  
震天下諸所過郡縣賄累巨千長跪稽首始得免  
德徵嘆曰文煥守此地乃不能邀還

車駕惠鮮困瘁亦已矣柰何剝下溷禮以媚權貴哉

吾不習是也彬大怒繫置之至揚州有李提督者彬親信之謂德徵曰知府寧不知大將軍尊重今天下第一人可亟圖之不則叵測德徵第張目未視不為應蓋提督心實是之為白遣之彬怒且未什曰知府不稱東昌乃調夔州夔蜀之僻下郡也蓋多豪家習橫不服租庸健訟又多無情實前後知府率因循待調耳德徵既至乃下令曰不用命者有常刑知府不能行姑息之政也然知府亦不故刻害汝蓋自是無有弗服鮮有無情者矣夔州稱治又夔及旁郡多貴人徃徃倚府為奇貨德徵

卷五

十七

皆不禮之有一貴人射木利蓋木值可四五十金過索五百金平章司臺憲司皆已許之德徵持不與都御史方列牘議薦且陞晉諸貴人盡害之初德徵官京師時又嘗以直忤要司官有氣力者乘此隙曰知府病矣宜罷然實不病德徵既家食闔門課讀暇則問農灌圃與諸生商確古今有言及時事者輒拂衣起宗族有不足賙之疆弗友教之皆習其化感其惠處鄉里人以禮然性頗豪俠有機謀善口辯故人亦不敢犯事黃太安人終身不違顏色以孝聞締交皆當世名士云乃於嘉靖丁

亥九月內疾作至戊子三月壬申卒詎其生成化  
壬寅三月丙戌年四十七配李安人即李進士女  
也側室竺氏子男堪粹美能文雅重士林娶董氏  
垣亦聰敏勤學娶李氏皆生員李安人出垆尚孩  
提秀異常兒竺氏出女二蘭適里人韓永壽桂適  
定州衛指揮使陳瓌孫男柯堪子也將以是年五  
月三日葬城南蘭家左之原銘曰何仲默稱德徵  
書類羲之詩擬杜甫其才甚美學可達於用雖歷  
舉時之俊彥未能或過也使大其位誠有可述爲  
權貴所害甚可悼惜今觀駕部之聲東昌之操變

卷五

十八

州之治其所蘊抱亦畧施行矣德徵雖不誕有天  
年堪之粹垣之敏垆之秀將必有嗣而興者天匪  
難謀也

大明通議大夫大理寺卿龍湫王公墓誌銘  
公開人也性貞廉介直正德初開守不理於多口  
時適大明黜陟苑洛韓邦奇爲考功員外郎太宰  
以守治狀不飾論考功詢之多士皆如太宰言然  
考功素知守才疑之聞公往問焉公當飯客考功  
故久不起公曰吾當飯客考功請同飯公曰弗堪  
供奉考功曰安有戶曹主事可食者而吏曹員外

郎不可食乎乃出一盂糲食二豆蔬共食之客去  
考功以開守問公徐曰開之士大夫皆曰守治開  
無狀民則皆謂守良守後得不黜考功以公違衆  
持公議草具待賓戚獨立佳士也遂定交云公諱  
經字邃伯別號龍湫王氏之先本鳳陽人始祖王  
洪武初避兵于開之別駕里遂爲開州人王生福  
榮福榮生貴貴生溥陽曲縣承始封承德郎戶部  
主事繼贈通議大夫右副都御史配牛始封安人  
繼贈淑人生公公童時莊重不群少長即知敏學  
伯右布政每見而喜曰昌吾宗者此子也弱冠中

卷五

十九

弘治戊午鄉試春試不第卒業大學先後所交知  
浚川王公後渠崔公蒼谷王公無涯孟公皆海內  
名士乙丑登進士授戶部主事是歲夏推

恩贈翁及牛淑人皆獲封尋陞本部員外郎署郎中  
時權瑾用事群閹倚勢請託公皆不顧未幾贈翁  
卒于官邸公哀毀如不欲生扶柩還葬服闋陞河  
南衛輝知府公振舉宿廢屏除積奸公移滿案兩  
造盈庭從容詳處皆中情理儒學諸生季必嚴試  
重行賞罰皆始怨而終服丙子當鄉試監臨東塘  
毛公以公有文望辟外簾錄文多出公手毛公喜

曰中州之錄可以式矣特疏薦曰知府學問深邃可學校憲職丁丑當考績時歲荒歉撫按以公素得人心留以撫之又二年遷湖廣副使初衛輝爲水陸南北通衢臺省權貴過者連車接轎公惟庭見一揖耳人固素知公亦不深尤也至湖廣適武廟賔天群臣奉

皇太后旨迎

今上嗣統巨闔谷大用者八黨之一亦在迎侍中強公長跪公不屈肆行悖侮公脫冠裂服奔赴

王府伏 啓

卷五

二十

王深慰答之而公即棄官歸

今上登極公上疏

奏劾大用奸惡辭甚激切凡五上而大用斥矣尋起

復河南鎮寇王鏜橫行河朔間公討平之總督

秦言副使累經戰陳親冒矢石故致克捷癸未陞山

西右叅政時巨寇黃太寶擄掠殺戮流毒郡邑公

擒之當道累疏薦叅政顧政鴈門行太僕卿公乃

乞歸疏凡三上始得允銓部覆奏謂公有冰蘖之

操州守朱君喜其名孚表其間曰冰蘖已丑薦起

四川左布政使土蕃芒部讐言殺累年公以恩信諭

平之會牛淑人疾即具疏乞歸鎮巡僚友懇留弗  
顧比泊廣都而淑人卒壬辰春起江西甲午陞都  
察院右副都御史巡撫本省地方以

恩詔階通議大夫贈翁牛淑人皆獲贈子行恕廕入  
太學公撫江西督逋欠清詞訟禁侈俗理陂塘恤  
民瘼事關藩臬符驗頗犯眾怒亦舉行之大者上  
聞乙未擢大理卿大理自正德以來避部院尊要久  
失叅駁之職公力舉行之由是眾情不堪私比者  
多不便左遷山東叅政蒞任疾作乞休不允部移  
慰留而疾愈甚疏再具未上而公卒矣公入仕來

卷五

二十一

凡四里居耕田讀書絕不干謁有司曲加敬重其  
取與進退大節無毫髮苟可以對越神明日用居  
處蕭蕭如寒士平生雖好爲詩文然多不存稿卒  
後行恕訪之親友僅得三百餘篇痛兄氏早亡撫  
諸孤若子先世所遺產盡以畀之公生于成化丁  
酉四月初六日卒于嘉靖丁酉正月十一日享年  
六十一歲有司延其主祀于鄉賢祠云配吳淑人  
繼張繼陳淑人子男三長行簡先公卒次行恕官  
生娶張氏次行果娶李氏俱陳出女四長適生員  
麻秉直次適趙玉俱吳出次適生員劉謙貞四未

字陳出孫男二長事稼殤次事稽未聘行恕等葬  
公於漢宣房宮祖塋之東新阡之兆銘曰古之君  
子寧身被窘辱不徇人以非禮之恭寧違衆孤立  
不少移乎堅定之守寧窮約終世不苟於一芥之  
取正德中如瑾如求成如大用生殺予奪生於呼  
吸公卿而下伏謁恐後孰敢與之較禮哉公獨抗  
而弗屈雖蒙橫逆而道愈亨矣其在大理也推評  
叅駁無間大小卒之衆議交口屹然不槌至謫遷  
而不悔也官至金紫而卑宮室菲飲食苦節以沒  
齒焉得不謂之古之君子哉嗟夫塚壘壘兮名未  
垂兮太史碑兮汗青之辭

卷五

二二

銘

公余同年友也精敏絕人余同年三百五十人張  
榜甫三日公皆識其字無遺一人故其爲士居官  
聲稱異等用不盡才時論咸惜云公諱整字豐之  
號雲心于氏之先本楊之儀其人勝國末諱彥成  
者徙籍于滁洪武初彥成伯子小乙從戎鎮江衛  
卒從高祖忠嗣之改編滁州曾大父和來省樂其  
土遂家于滁和生大父椿軒處士能生父璿號

南溪母莊氏成化六年庚寅正月八日丁亥生公  
公生而靈異少而穎悟甫十九歲廩于州庠弘治  
壬子應天鄉試中式春試弗第卒業大學歷事刑  
部留心律例諸生或曰于子學養子而嫁耶將備  
大人之事乎公曰書言典常作之師是

祖宗創述精意一代法程也况今日歷事乎非昔國  
學諸生也正德戊辰登呂柟榜進士授戶部主事  
部送大倉銀十數萬給邊羨餘數百悉籍以付主  
者嗣部檄主守徐州倉以慎修聞庚午時太宰以  
風憲重要宜博選天下知名有効士充之且以其

卷五

二十三

事密付文選主事韓邦奇南京部寺及府佐以下  
預選者三十餘人公爲優薦焉改授廣西道監察  
御史公有憂色曰朋益之慶可榮而鼎重之勝可  
懼也而御史之聲名乃著通歷三載奏最於是南  
溪翁封文林郎監察御史莊贈孺人繼母周及室  
余并封孺人尋奉

勅督長蘆鹽法兼視河道所至剗弊剔蠹風裁自持  
時薊賊楊虎等大掠河間諸郡縣勢甚猖獗公適  
駐滄賊前驅猝至城下州守遁去人情惶駭莫爲  
守賊登城謹甚公策賊衆多脅從非得已者服朱

衣坐臺中臺面城邇賊從城上望見公相戒曰毋驚動

欽差果相率詣臺門乞命公諭以無留城中及殺人劫庫自非首惡並許自新皆懼呼羅拜而去公命吏數輩招降數百人賊勢孤餘兇就縛後按巡宣大宗屬監軍廝養誘脅大戶包納而率乾沒公私受蠹公廉知之詭曰是多詐譎焉有

帝胄中貴不自愛重者掩捕十數人治其罪勒限令償上下肅然莫敢犯踰年代還有武臣獻其妹侍武廟而憑籍寵靈緣為奸利公率衆御史攻之不報

卷五

二四

抗疏再陳至曰不韋進美姬而潛易秦春申成李園而卒傾楚明皇寵祿山而幾危唐亦不報左都御史彭公慎許可獨器公令與張御史准看詳諸文字會大理寺丞缺員銓部欲擬公公聞之急白彭公言故事官即等當以俸差周御史倫實先干齋齋弗可越彭公嘆曰君可謂慮廷之吏矣丙子陞浙江按察司副使浙為大藩獄訟繁劇號難理公治之易初孝豐土豪湯毛九等負險拒命積歲不服

上命都御史張公津提兵克之公與議協有白金文

綺之賜壬午

今天子龍飛覃恩臣下南溪翁得與公服色同進金紫既陞山東按察使初余孺人卒繼室宣聖裔孫及使命下公引嫌求改適考察當路有與公弗徇者為非語中遂調貴州公曰吾拊心無忤已矣人言詎損我哉欣然抵家拜先隴登堂稱壽召昆李姻友陳說平生無幾微見顏面乃抵貴賁俗故麗厚文莫有撓者公甚安之嘗曰得行其志者其貴陽乎乙酉入覲然公意亦倦游矣遂致仕時年五十有五南溪翁既八十翁之弟率菴居士亦七十

卷五

二十五

有七皆白首康強歲時公率姪泊子若孫殆數百指拜階下人嘆羨以為難得公自筮仕至休致一簾自持比歸簾無餘費已而貴陽舊僚致前未支俸七十金至付子弟令綱紀以贍生家始日裕乃買田左山上泉之麓構屋其上雜時花木義興杭公淮額之曰上泉莊因自謂泉莊老農且為莊之十四景各有標題徜徉瞻眺超然有舞雲之意且曰景外之景標題豈能窮哉丰州時與公游未嘗輒有造請郡公禮敬焉南溪翁病公侍湯藥如少兒既卒斂葬虞祥一如古禮比禫則公年亦七

十矣與鄉先生爲清平會公自里居雖絕不干謁  
然不忘拯世之志凡有可以便民裨治者必告有  
司傾懷無隱問學務詩文不事模擬而能道已  
所欲言尤究心六書之學平生精力健甚幾八十  
燭下猶能作蠅頭楷書衆以爲雖耄未艾也乃丁  
未冬病胃痛藥不即功以今戊申春二月二十有  
八日卒于正寢享年七十有九配余孺人繼孔孺  
人皆先公卒子男九長野亨貢士山東城武知縣  
奔計哀痛感疾後公百日卒娶張氏次咸亨先公  
七年卒娶李氏次光亨大學生先九年卒娶王氏

卷五

二十六

次節亨蚤卒俱余出次賁亨孔出次心亨亦早卒  
次復亨中亨永亨俱側室沈氏出女四自孔出者  
適滁州衛指揮同知謝承勳自沈出者一字指揮  
僉事姚應禎二未字孫男四曰世材世延邵學生  
茂而賢克世其家世建世瞻皆幼女十曾孫男三  
曰居厚居默居易女二音亨等卜以十有一月二  
十五日葬公左家山隴世材以太叅胡公狀來問  
銘銘曰惟滁之陽山有泉庄山高千仞上有鳳翔  
庄景竒絕標題靡窮徜徉瞻眺有冠有童昔我冠  
豸實抱先憂出持風裁入獻忠猷我竭勤誠世兮

我遺時哉後樂萬景俱宜不忘拯世有拂吾膺吾  
豈寒蟬嗤彼季陵公年八十黃髮童顏謂當百齡  
遽爾貞還公才則豐公位靡亨斯志斯銘斯銘稱  
情

大明中順大夫夔州府知府韓公墓誌銘

弘治戊午予與公應試長安會旅邸蓋蒲多士冠  
也見其方直樂易心愛重之既聞公登正德登酉  
鄉試明年登進士嘉靖戊子再會京師而公已歷  
官至戶部郎中後拜知夔州府壬辰公高蹈歸乃  
聞之許判言公善處鄉鄉之縣尹以下無弗善公

卷五

二十七

且言其康強不似老人當獲上壽癸卯則公季子  
綸持王舉人業狀來問墓銘然享年已七十一矣  
公諱坤字子厚號上原姓韓氏世爲華之蒲城雙  
桂里人高祖志川曾祖林祖銳父宣贈工部主事  
母李氏封安人皆以公貴也公生而有殊質穎敏  
絕人八歲就學日誦千餘言人皆奇之未弱冠補  
縣學生每試輒居上第既登進士授嘉興知縣嘉  
興爲浙巨縣民衆事劇且當吳越閩楚衝號稱難  
治公單車之任約爲章程次第而徐理之剗弊修  
利治爲郡邑最時宸濠稱亂揚儀賓者濠黨也潛

穴公境內府守貳疑莫敢動公毅然發吏捕之生員金燦者父為糧長折價三千餘兩燦禁錮累歲莫能償然力學不怠公悲憐其意釋之後燦登進士為御史初燦既釋懷金幣謝公曰吾為天下惜才非私燦也卻之嘉人為詩歌其庶陞工部主事督臨清閘

章聖皇太后自興邸駕經臨清嘉公能錫金牌羊酒勞之今

上登寶位推恩宣翁李安人獲封贈焉既而改戶部督催湖廣軍餉會李安人卒守制服闋陞員外郎

卷五

二十八

尋陞郎中公自主事至郎中部尚書皆稱曰能陞四川夔州府知府夔為蜀僻郡吏治多苟且民習久弊樂寬縱便姑息紀綱弛甚公曰為政如水火火烈易避水弱易溺民已慢矣是上陷之也乃更約束易置府吏以剛克之未暮年治效至不捨遺南川賊勢猖獗兵備張公謀築隄城中隄方五里高三丈人以為必湏歲月公計丈任工身自督之五日而成蜀人以為神有神明伯夷之歌然公既方直不隨俗好忤當道意乃解印歸歸則日以讀書教子栽花種竹為樂歲時招延故人賓客晏笑

終日人間事若弗知也優游林下蓋十餘年卒公  
生于成化九年十月初伍日子時卒于嘉靖二十  
二年三月初八日戌時公雅好圖書尤邃易學又  
樂與人爲善每見里中後學有善即極稱揚晚年  
尤任真不矯飾人有過必面諭之改云配原氏封  
安人有內德二室陸氏劉氏子男六邦維先公十  
七年卒娶李氏繼郭氏邦紀娶孫氏邦績娶屈氏  
邦緒驛丞娶李氏繼原氏關氏邦經生員先公七  
年卒娶武氏邦綸監生娶孫氏女三改兒字李氏  
夔兒未字丁兒未字孫男六女九小釗適生員曹

卷五

二十九

紳四釗字原氏詩娶趙氏繼王氏釗兒適郭資桂  
兒未字說娶孫氏繼關氏諒聘屈氏三釗字郭氏  
詔未聘琴兒字孫氏長春未字謨諫俱未聘玉佩  
蟾桂俱未字曾孫女一香兒未字邦紀等以是年  
九月二十九日葬公於先塋之次銘曰蒲之水水  
清清思義君子無忝爾生蒲之原原如砥方直君  
子視其所履嘉之政如霖之潤夔之政如霆之震  
公之才如金之鍊可革可從因地而見蒲之隴鬱  
乎葱蒼公之幽堂龍首之藏

大明通議大夫都察院右副都御史進階正

奉大夫陳公墓誌銘

公卒訃聞

上命禮部遣官諭祭工部營葬事公甥叅知大夫郝君元洪具狀子詩介子誨來請銘曰公治命也予好公蓋十五年餘比予督撫山西蓋又三年餘每公禮公必至予室歲時予亦省公于第蓋自是情款愈浹洽然公未嘗一言及私予乃䟽薦之朝畧曰都御史璘歷任以來聲名耿耿抱籌邊馭衆之才有謹身務實之行及膺巡撫之任適當多事之時七䟽求歸而未得一被人言而即罷可當大任

卷五

三十一

者蓋未及柄用而公卒矣公諱璘字邦瑞號二石山西太原之陽曲人也曾祖福聚祖榮贈知州加贈右副都御史配趙氏贈宜人加贈淑人父智至兩淮都轉運鹽使司同知封右副都御史母商氏初封宜人加封淑人其世德懿行蓋載陳氏家傳云初商淑人將就蓐夫大雷雨生公既浴而靈蓋以是人知其遠到云公幼聰穎度越與群兒嬉每曰我蓋官也爾輩為胥輿群兒皆用命云當就外傳時轉運翁命師王公槐受蔡沉尚書盡得其精微槐蓋三晉明經士云十九歲克府學生少師楊

公督學政課諸生見其文奇之曰陳生俊人也  
由是陳生聲名籍甚三晉士無不推先陳生者本  
少師延譽之力也少師者世所稱塚菴者也蓋素  
秉知人之鑑云弘治己酉中鄉試第二刊文爲程  
式癸丑賜同進士出身第一授太常博士同官者  
蓋推博士多識典常也乙卯相

孝廟享南郊見博士氣宇周旋悅甚面咨何官蓋欲  
超遷不果錫寶鏹一時縉紳稱榮云三載考績封  
商淑人爲宜人蓋從轉運翁知州時階也戊午拜  
監察御史勅巡居庸諸關關者崇岡峻壁天限華  
夷惟數十里或百餘里稍鳥道通城守之固若金  
湯前後監察蓋率付下吏閱圖貼竟事耳于是御  
史乃躬歷險阨疏可城守者立將官增戍兵曰勞  
一時可爲千百年之計者

卷五

三十一

上曰御史言是蓋迄今邊腹未賴云未幾巡按山東  
有近貴來山東取礦砂蓋近貴素多內援又荷

上命若御史無若我何御史曰民力竭矣豈復堪益  
此邪疏論之礦役竟罷蔡河淤塞河流逆決民田  
匯爲巨浸而稅尚在民民曰之御史御史曰是可  
導入漕河者蓋後蔡果入漕粒食乃登云先是孔

闕遭回祿修未完御史度工定期尋乃奏成

上遣官立

御製碑文特嘉御史績御史勞資既深宰司轉遷有彝格御史執法不阿多忤尊貴人尊貴人盡憎嫉之遷浙江提刑僉事蓋臺官以僉事為淹滯人多為僉事心不平云僉事至浙摘發興除不異山東時既而又遷陝西死馬少卿少卿亦不以死馬為閑散馬蓋蕃息焉時少師楊公總制三邊疏薦少卿賢遷布政司叅政蓋督軍餉於是邊儲大足而民且稱便云遷河南按察使蓋其時豪滑交納

卷五

三十三

宗室侵越法制及發覺然又依馮城社乃罔恒獲人皆患苦之按察使下令曰自今敢匿人者連坐捕獲悉正其罪境內肅然鎮守王太監蓋殘墨特甚然又正德時也民不堪命按察使面責之而王亦知自戢云遷右布政轉左布政蓋自此經濟大畧益為著聞乃遷都御史巡撫湖廣改撫延綏蓋北虜寇邊警報特甚以都御史抱籌邊才也于是繕城堡利器械足倉廩募戍兵選將官邊威益震丙子虜賊寇邊斬獲甚多

武皇降勅獎勵定靖清平邊墻功成有金幣之錫虜

復寇邊復大斬獲捷 聞

上嘉都御史能稱

賜蟒衣三襲前此都御史未有者蓋異數云都御史  
三年天官舉常憲奏

上錫諾推恩及祖且廢嗣入監旋推立待蓋公亞有  
內援者得之既而以轉運翁及商淑人老累疏乞  
歸

上曰璘素有才識又曰璘操守清慎已有旨勉留着  
用心巡撫地方乃復起視事時總兵柳勇叅將李  
永定把總許國下雲蓋交納中貴久緣為姦利軍

卷五

三十三

心顛怨目為四害都御史曰凶虐若此坐視之是  
都御史縱長耶劾罷之三軍稱快會大將軍彬導  
天子北巡邊塞駐驂延綏蓋三月天子寬仁恭儉惟  
彬黨橫甚處之難都御史執大體酌時宜雖彬兇  
焰竟不害帥臣戴欽恃其權位又彬黨也敢肆簡  
傲都御史怒甚蓋手自擊之有逆子既成獄彬欲  
活之亦不聽邊人相語為真都御史云乃都御史  
又引疾乞歸

上亦不許報曰璘素有才譽有疾善自調理以副委  
任亦不允蓋未幾而商淑人轉運翁訃先后至矣

公自以前後乞休心本爲親乃弟能侍湯藥奉治  
命哀痛踰禮幾至滅性疏 聞

上命工禮二部祭葬如例時彬又導

天子南巡江漢蓋廷議以上郡北邊重鎮

天子外巡乃奪公至情固留公候代已而

武皇上賓有不好公者蓋疏論公謂都御史宜罷詔

從之公竟罷去未幾詔進公階正奉大夫云公才

既敏達而性復剛毅茂實敦本崇儉不能爲閃倏

媚悅之態爲諸生時教讀提刑司有攘金人爲亡

金者訟攘金人蓋以二百金賄公公嚴拒不納同

卷五

三十四

事生潛誘取之而亡金者坐誣後亡金者得直事

發覺同事生皆坐法公獨不汗登甲時蓋有當道

知公者或謂通名可得吉士官公不通名當彬竊

柄時蓋諸司皆以賂贖彬公不賈賂慷慨任事凡

所爲蓋時所深避而不肯爲者云公生于成化三

年八月十八日申時卒于嘉靖十七年戊戌十月

初七日申時享年七十有二配閻氏贈淑人繼周

氏封淑人生男詩官生娶郭氏繼張氏女長適太

原指揮榮泰次適陝西叅議郝元洪俱封恭人繼

雷氏先公卒側室段氏生男論監生行二娶張氏

張氏生男誨府庠生行三娶張氏謨行五聘秦氏  
生女適喬永殷官生王氏生男諮行四聘包氏張  
氏生男讜行六訓行七俱幼彭氏生女字周元禕  
孫男恩女二詩等將以嘉靖十八年 月 日  
葬于

勅建新塋馬南之原銘曰於惟那哉公才浚明濟濟  
晉多士孰不推陳生雍雍顯相天子咨名倬倬監  
察六郡澄清得金矢於廉訪銘旌常於節鎮山之  
東河之南榆之北憲憲令聞我既持斧孰敢越厥  
行我既秉鑑孰敢詩且張我既杖鉞孰敢侵于之

卷五

三十五

疆公奏膚公折馘滿車

天子曰都若汝予嘉蟒衣燁燁襲幣煌煌益之以白  
金錫之以龍章崇關巍巍中華賴之蔡河湯湯斯  
民戴之吁嗟乎公哉有庸豐哉勤勤七䟽懇乞投  
簪

天子曰咈徃盡乃心公既歸止恬然忘世戊戌孟冬  
公乃長逝有司計 聞

天子曰噫

勅葬佳城隆以

諭祭佳城如崗鬱鬱蒼蒼寶竇不足以爲固四備不

足以爲祥於惟那哉公之德千百世其永昌

大明通議大夫都察院右副都御史張公墓

誌銘

正德戊辰余與公同登呂柟榜進士識公於南宮  
後十餘年同官於晉陽撫臣當歲薦凡藩臬皆列  
奏牘而余與公獨弗與余時致仕將歸公憮然抵  
余書曰君茲歸矣文魁退且未能進則弗達將若  
之何哉余復公曰或去或不去歸繫其身而已矣  
公翻然曰我道無怨無尤餘將付之天也後余起  
撫晉陽公亦撫朔方未幾皆乞歸比余起總河道

卷五

三十六

方擬得再晤而公已卒云悲夫公姓張氏諱文魁  
字元甫別號字川河南開封府蘭陽縣人也其先  
本山東單縣人勝國之季高祖長公者避兵蘭陽  
因家焉曾祖宗信贈通議大夫都察院右副都御  
史配某氏贈淑人父讓遞運所大使封承德郎刑  
部主事贈奉政大夫按察司僉事加贈通議大夫  
都察院右副都御史配畢氏封安人贈宜人加贈  
淑人初弘治辛亥公方垂髫河決城舉家舟而覆  
恍有朱衣人掖公泊於林杪以免弱冠補縣學生  
正德丁卯鄉試中式戊辰登進士授刑部陝西司

主事特權瑾流毒縉紳衆爭以苛刻冀自免公獨  
多平友人皆危之弗恤也既而連丁內外艱服闋  
赴部冢宰曰是權瑾時執乎主事耶陞刑部山東  
司員外郎平反如主事時陞山西按察司僉事巡  
冀北道初大同當權幸隨駕經過之後地方官緣  
爲姦利至是巡按張侍御英檄公勘之公按都指  
揮章傑宋文尅削軍資十四萬禡其職竄巨猾陳  
萬尚寧於炎荒既而督修沿邊險隘身徃臨巡嘗  
遇伏虜於橋頭堡公以護兵直前迫之皆遁去胡  
中丞錠薦公才賜帑金十兩陞布政司左叅議復

卷五

三十七

守冀北首䟽宗室聰濶長史趙寬太監王哲總兵  
楊玉數十家之橫罪其黨二百八十餘人權勢斂  
跡覈追豪商蘇雷通稅八萬餘金皇店李瑀通課  
十萬餘金充軍儲又閉大同關王廟以釐請罪之  
俗毀潘府聖母祠以絕結緣之妖楊中丞志學僉  
侍御集皆謂公宜民之仁足餉之才擊強之威可  
方古人云陞陝西行太僕寺少卿大同副總雅重  
公以鞍馬金器馳賀於陝公曰吾不以易地易界  
也卻之陞苑馬寺卿裁革豪強私買私賣之弊馬  
政以清勅有庶靖不苟蒞塞有獻之捷陞山西行

政司右布政使尋轉山東左使華堂食裁冗費羨  
餘月計千餘金別貯以資海道備倭之用楊太史  
維聰謂公直諒之心剛方之氣清苦之操淹貫之  
學經綸之畧實有人所不可及者云適寧夏撫臣  
告缺屢議以公久歷關陝大同陞都察院右副都  
御史建節朔方虜三八公指畫方畧捕斬四百餘  
名顯捷聞凡三拜白金文綺銀牌之賜陞俸正二  
品唐吏侍龍謂公秉度策動儼然爲疆場之鎮夏  
人管黃門律亦曰夏州撫臣剛折而柔廢惟公不  
始不吐得撫臣體云嘉靖戊戌春虜困夏遊擊於

卷五

三十八

宴官湖公得報自率大衆援之虜始遁因襲寒感  
疾力求解任不允會大慶推恩封通議大夫誥有  
鎮危立利比於南仲之詞於是信公某叔人讓公  
畢淑人皆獲封贈廕一子入監乃有不悅公者罷  
公節鉞俾叅知行省政事公力辭以都御史致仕  
云既歸杜門謝客鳴琴賦詩時召親故子弟能文  
者考德問業終日不倦偶晨興曰何錦衣甲馬者  
充斥吾庭耶居數日乃卒云公生於成化己亥九  
月二十七日卒於嘉靖二十一年七月十九日享  
年六十有四訃

聞特遣河南布政司孫左使存諭祭有式揚風紀屢  
獲戎功爰念徃勞良用悼惜之文兼

賜帑金三百兩夫匠一百名襄葬事飾禮備物制也  
維公聰察沉毅剛直果斷內行修謹雖隆夏未嘗  
裸體晏坐盛怒未嘗撫案大叱嚴於嫉惡見吏之  
貪汙者如仇讐然服善休休若已有之陸太史弇  
謂公氣清而貌灑身若不勝衣而中剛有制至臨  
大事決大疑確不可移云配許氏繼配王氏俱贈  
安人淑人繼配郭氏封淑人子二長九德早卒娶  
袁氏以貞節顯次三綱官生娶袁氏三綱將以是  
去堂餐清苦之操揚太史言

卷五

三十九

年三月初十日葬公於縣西十五里之白雲山來  
問銘銘曰都丕休哉大河之濱混混淵淵篤生偉  
人倏倏按察為多為軼昔彼憑城今成窟黜廉靖  
不苟淵塞有猷公拜稽首對揚皇休羨餘是蓄乃  
天子命我仗鉞西疆首功四百我伐用張  
皇三錫命金幣斯承惟公大作益之十朋爰念徃勞  
天子悼惜飾禮備物用光寔宥傳有太史勲有旌常  
維千百年並視銘章

大明封刑部河南司主事王公墓誌銘

公蒲善士為養而商也生財而有道行貨而敦義  
轉輸居積而手不離簡冊志不忘惠澤鄉閭愛之  
朋儕宗之士大夫宗讓之唐儒有言人固有墨名  
而儒行者夷論公世可謂商名而儒行矣斯亦不  
足以有述乎公卒子安慶太守君奉狀問銘太守  
君予貳司寇特友也僉推入本科本科者貫城弼  
教之間謂之掌三法司事蓋司寇三士之奇選云  
公諱瑤字文充號素菴姓王氏山西蒲州宣化坊  
人系出龍門後徙榮河元季始祖仲文為河中府  
掾配文孺人洪武初籍于蒲仲文生彥純彥純生

卷五

四十一

秉信公高祖也曾祖景嚴祖榮壽官父馨號敬齋  
以貢士授鄧州訓導陞魯山教諭贈徵仕郎中書  
舍人配張氏贈孺人以季子中書某貴云公幼而  
純雅不與群兒爭稍長贈公授以孝經四書即領  
畧大旨贈公累試不第家業中衰公乃罄服買弘  
治丙辰贈公之鄧州諸子皆從祿薄弗給公貿易  
鄧裕襄陝間而資漸豐乙丑贈公遷魯山地產竹  
木麻漆公取良產治器用中度至今土人式之正  
德中贈公致仕歸資漸耗費公行貨張掖酒泉間  
又嘗同諸商依酒泉兵憲陳公赴河西忽傳虜至

急趨近堡守者不納衆惶懼失措公從容安置貨物城下團列騾馬挽弓抽刀倚城自保陳公行城見之納入堡問曰虜迫近何爾整棚不亂也公曰等死耳湏竭力拒衛安能俯首待戮陳公壯之公因出布絹犒軍吏陳公義之隨陳公至酒泉適哈密之變軍將多密約寇爲內應陳公孤危無可與計事者乃召公集諸商誓曰今我與爾輩寄命於此即有變俱當首禍其爲我親軍公率諸商晝夜披甲胄挾弓刀環衛儼然一裨將矣陳公盡收反者誅之復貨鹽淮浙蘇湖間往返數年資乃復豐

卷五

四十一

故贈公張孺人暮年樂享孝養嘉靖壬午贈公卒公哀毀踰禮築堂奉柩癸未張孺人繼卒公哀毀如贈公越明年合葬新阡家衆請析公以見金與弟姪獨取長蘆引數千尋赴長蘆守支未獲孫安人卒太守君及諸女俱幼公聞訃泣曰瑤三十年勤苦未嘗念妻子今忽若此誰爲撫顧急欲圖歸大名王某故人也爲其戚張商者貸二百金公盡贖付之張商不償遂僑滯大名有夫死子幼翁世將賣婦爲棺婦泣曰以一棺而子毋翁姑離矣公鑿之罔以棺婦感激撫子養翁姑終身不再適

忽聞中書君疾革奪資奔赴至京而中書君已卒公日夜號泣携孀孤扶襯歸蒲以餘資命長子服賈供二家費辛卯州守請鄉飲固辭始就後再不赴家有崇公曰瑤家世樹德崇者何也爲文誦神崇息明年太守君以進士授刑部主事公作書以五刑明允勿致枉抑爲戒又明年迎養至京

廟祀禮成推恩封承德郎主事次日趨朝謝恩縉紳榮之爲詩文以贈居京六載與金陵熊公杭州馬公會稽周公張公蔣公胡公南昌胡公杜公關西張公都城賈公爲九老會命工審象繪形各藏之

卷五

四十一

家爲子孫世講計庚戌太守君有安慶之命公曰汝今爲六縣主一舉動即六縣安危也君奉公抵家請就養府邸公以久離鄉土欲且盤桓數月君重違公意辭行公申戒曰吾不憂汝不能振耀官常利用明作但謂果于自信過激或罔耳君抵安慶甫百日方圖奉迎而公訃至矣公素強健日南至謁先祖中寒明日戌刻卒遠近吊者幾千人哭皆盡哀初公天性孝友待贈公張孺人曲養無方兄弟衆多公身任其勞內則孫安人獨爲窘悴當衆子大變恐傷親心不使聞知寸絲尺帛不入私

室每念諸兄弟無依雖在京師猶以益引經營必  
資其用與人交忠信不疑於故舊竭力惓惓雖僕  
厮亦令得所云公生于成化甲午八月初十日未  
時卒于嘉靖庚戌十一月初七日戌時享年七十  
有七配孫安人先公卒別有誌繼孟安人子男三  
長崇義娶張氏次崇祖未娶卒李崇古即太守君  
也娶張氏女五長適沈江二適張允齡三適閻一  
鶚四適監生甯瓊卒五適庠生劉一直早卒皆  
孫出孫男三女四以今年仲冬十又二日葬公子  
祖塋之次銘曰浦有美人儒而商江南塞北飛車

卷五

四十三

航本為養親營四方王氏奕奕家用昌兵憲孤危  
無可將我披甲胄事戎行桓桓丘憲謀孔滅流血  
滿城逆屍僵有子負才上廟廊西臺凜凜持刑綱  
公乃教子慎允明叶勿令五麗含冤傷煌煌龍誥  
承恩光衣冠俯伏覲

神皇白身誰登

天子堂瑤函錦軸陳詩章九老彬彬真良朋叶佳辰  
勝境時徜徉審像圖形各家藏子孫世守思不忘  
惟公積善有餘慶叶馬鬣鬱鬱氣葱蒼止生橫形  
公之崗千祀萬祀永無疆  
苑洛集卷之五

苑洛集卷之六

大明叔祖考朴菴府君暨叔祖妣陳孺人合

葬墓誌銘

惟我韓氏世楊武烈肇基有宋邁迹先元鎮于蒲  
關封茲朝邑至于髯祖志違膚敏守東陵之節樂  
首陽之薇始罷武階齊于編戶我先祖平輔府君  
不違光德得春府君乃構肯堂惟我高祖府君恭  
克類惟肖不隕厥問惟我曾祖府君整聿將厥家  
用宏茲賁曾祖生五子長我伯祖考府君希孟次  
我祖考奉政大夫府君顯次我叔祖考武清令府

卷六

君倫次即我叔祖考朴菴府君次我叔祖考府君  
俞村菴府君靈俊越人芝玉是粹我曾祖曰都惟  
家之慶命之曰英字以世傑爰擇名族卜于媿氏  
媿氏曰都惟陳孺人其德恒一乃召六禮敬戒歸  
焉乃弗吊天毒降災中遭家變我祖考府君方踰  
弱冠奄忽捐殞我先君中憲府君紹宗晬未及周  
呱呱而泣而我曾祖乃復倦勤于家集諸祖考分  
授以事曰希孟汝綽而惠其司吾出納庶不召讐  
敵于鄉倫汝敏而秀其勤于學庶光吾宗英汝謀  
而紀其行貨于商庶將苟羨俞汝勤而茂其視我

田疇庶有京積恰如威如庭無間言故我先君雍  
容力學臻于大成諸祖考擁翊之功于茲宏矣惟  
我朴菴府君玉立長身沉毅善智既奉我曾祖之  
命遠服賈酌財費修宗族之恩廣鄉閭之義外禮  
宿親交納當世貴人而吾韓氏益以大矣又嘗先  
身解扼士之難煮穀活殍人之饑返枉判之田誅  
不義之僕望廬息爭者之訟迎門多長者之車而  
我朴菴府君令聞廣譽蓋于一鄉矣惟我陳叔祖  
妣貞柔淑慧婦道是修妯娌說其恭則孝可知矣  
臣妾感其惠則慈可知矣我朴菴府君行聞既成

卷六

二

則其內助可知矣易曰男正乎外女正乎內吾韓  
氏之興不有由哉子男一續宗娶仇氏繼孟氏女  
四長適謝闇次適仇便次適白儒次適賈宗學孫  
男六邦憲縣學生娶許氏邦忠國子生娶王氏邦  
樹承差娶趙氏仇所出邦召生員邦望邦本尚幼  
孟所出曾孫邦憲男一仲讓生員聘李氏女二采  
蘋字生員樊藻采繁邦忠男仲謙聘樊氏仲講聘  
程氏仲誦聘孟氏女二采蓮采芹朴菴府君生于  
正統庚申正月二十日卒于嘉靖二年九月二十  
一日壽八十有四陳叔祖妣生于正統己未四月

二十五日卒于嘉靖四年七月二十五日壽八十  
有七銘曰維嘉靖乙酉十二月有六日我叔祖考  
妣往即幽堂阡于垣中域彼四方裁肪切玉佳氣  
鬱蒼惟吾叔祖考妣之德吾族其將永昌

西河散人墓誌銘

西河散人郭守道自號也散人者散散之人八極  
之表溘落之淵寒萬物莫得而拘焉乾坤不得覆  
載我日月不得照燭我雨露不得霑濡我四時不  
得寒燠我陰陽五行不得化育我究其本真歸諸  
大源莫容莫破莫得而名焉又其次爵祿不能維

卷六

三

繫我貨利不能引誘我功名不能羈絆我寵遇橫  
逆不能感激我若千仞之鳳萬里之鵬飛翔扶搖  
于天衢之外人孰得而攀之散之義大矣守道自  
號也何居考其言論幾于窺次散之意乎守道天  
資異越冒襟晚落觀其外循循乎若無懷氏葛天  
氏之民也叩其中其莊南華列玄洞之傳歟郭氏  
關之大族祖父以來中衰矣守道裕然自適若無  
不足者既老猶不長尺寸初里人以守道之能能  
大郭氏者勸之營產業為妻子計守道曰法聞之  
斯世羈棲之宅也夫婦偶合之情也兒女適迨之

恩也吾身性真之主也夫羈縻者至暫也性真者至重也偶合之情邂逅之恩至輕也夫營全於至暫之寓者愚哉至重以趨至輕者惑法弗能智亦安敢愚法弗能哲亦安敢惑法不敢愚且惑故不敢勞勞然以傷吾真也有詈守道於市者若罔聞知人或爲之怒曰郭守道何有於豎子耶顧爲之辱於市守道曰人之所爭者勝也彼詈吾吾固勝矣今夫人於群眾之中曰某德之表也則將欣然而悅之矣某德之棄也則將忿然而怒之矣彼無故而詈吾於市彼德之亡衆所耳目也彼固自詈

卷六

四

而頌吾德矣焉用較有司兩舉鄉飲皆不就或謂之曰鄉飲禮法之所在也深衣幅中所以示威德也斯固榮名之所在而鄉里之所崇矣守道曰誠若此異乎吾之撰夫禮法者性之縲綬也巾服者身之桎梏也榮名者人之陷穽也若之何而被縲綬荷桎梏自蹈於陷穽之中歟初張居士王伯利者闢之善士也中興王氏公納交而崇讓之長老或謂守道曰郭氏子何崇二氏之深也無乃羨其能而見其有乎守道曰然顧法無所利也夫矜不能而妬勝已避已嫌而遠善人常情也惟有度者

能無妬能不避也法焉有度心寔好之矣一日與鄉老泛舟而觴一叟潛然泣下守道亦泣焉守道曰吾叟何悲也叟曰吾傷夫流水之無盡吾生之易窮也吾始成童吾祖父携吾舟於斯固若是之湯湯也吾壯而客於江湖之外幾往而幾歸固若是之湯湯也古今之代謝生死之相繼吾如水何哉守道曰叟過矣夫往者過來者續叟見水之無盡也然過者過矣過者未嘗續也焉用悲叟曰子亦何悲也守道曰吾見叟之悲而悲之又以見物我之同情矣水與吾固一體也又何羨於彼乎正

卷六

五

德丁丑十二月十一日守道疾革呼諸子曰生寄也死歸也如父客於外而得返鄉園樂莫大焉諸子可勿深哀遂卒年八十三守道諱子法守道其字也吾朝邑大慶關人配張氏子男二長俛起家幾萬金

秦府典膳關雖幾千家莫俛並焉娶趙氏繼娶張氏次爵克佐俛守業娶王氏女一適李倫先卒孫男五孫女七俛之子希孟娶潘氏希閔聘張氏一適商人樊會一適商人王廷祿一適庠生韓邦達一適商人楊鼎爵之子希曾娶衛氏希冉聘王氏

希顏未聘一適

秦府典膳姚本源一適商人何騰一幼未字銘曰  
守道又有言曰地無撮勺之土天無呼吸之氣江  
河巍巍而高泰華滔滔而逝晝昏昏而夜昭昭象  
兩翼而鶴兩蔭茫茫宇宙孰生孰死載觀斯言亦  
散之旨

大明茂才趙生仲禮墓誌銘

嗚呼痛哉吾仲禮萬人之傑也今遽已矣夫死生  
修短常理也吾不傷之吾傷夫其志也仲禮不知  
余之不肖也謂行己之學治平之業在茲矣篤信

卷六

六

而深依之探其志蓋欲凌跨董賈比迹關閩奮乎  
百世之下也迺竟不售嗚呼痛哉仲禮諱天秩字  
仲禮世爲吾朝邑泊子村人父世榮亦從余學母  
馬孺人仲禮生而靈異幼而端楷里之士夫父老  
每曰趙氏兒行不左右顧惟以自視鼻未嘗見與  
人交一言其族祖省試子春謂其天生道學不假  
修習書一過目記憶不忘博通五經子史諸大家  
文章而周易尚書兩經能爲舉子業尤精易占六  
歲時世榮遣其兄天叙就師仲禮亦欲往世榮不  
許乃終日不食世榮從遣之每誦讀雖暑夜世榮

已起將農穫而燈猶未熄每奪其燈令寢焉年十五  
余歸自晉陽仲禮請從遊世榮以其幼恐無受  
教之地乃涕泣固請來學時於周易已精且熟余  
以春秋以來論式示之數日後課一題即單襄公  
論陳亡體也甚奇之自是學愈勤無故足不越闕  
不妄與人談立曰光陰可惜也庚子治尚書纔五  
十日而亦精且熟余乃言之太守兄及紕陽諸弟  
召令誦說終始不訛一字試以義若老於尚書者  
共驚以爲神乃謀以族孫女妻之癸卯春鳳泉王  
公歲試即以尚書魁多士余每語諸生古人建立

卷六

七

事功多在少年如孫策歿時纔二十七他日再言  
之仲禮曰所遭之不同也使天秩當其際豈肯令  
孫權保有江東哉余嘆曰此武侯志也是歲秋關  
不第歸途次感疾抵家三月而卒仲禮靜淵沉毅  
人莫窺其際余未見漢皇叔度當亦不過是也而  
竟以天歿嗚呼惜哉痛哉仲禮生于嘉靖甲申十  
月十九日卯時卒于嘉靖癸卯十一月二十九日  
未時年纔二十耳事天叙友愛特重天叙亦以奇  
童拜名先卒無子仲禮奉嘗焉初馬孺人數夢兩  
紫龍入室即飛去二子生生而皆大此其徵也配

韓氏無子以堂兄天祐子光業嗣銘曰余嘗觀關  
中形勝西自崑崙發脈落於三輔長河自西北而  
南華嶽諸山自西而東會於潼關水口纔丈餘耳  
關鎖之密結構之巧天下莫並也京兆扶風漢唐  
來名賢相望而朝邑又氣止之地顧少聞焉意謂  
必有建功立德之賢待時特起及見吾仲禮謂文  
武之器將相之業在是矣乃又少折豈渭洛二水  
界破天心邪且三水皆崩走不常故氣之聚也則  
賢才生其散也則隨之而歿如吾五泉大夫靈破  
雷子徃徃皆然可恨哉嗟吁乎紫龍飛兮何日歸

卷六

八

今吾無淚可揮兮

大明傅太宜人墓誌銘

太宜人卒子武庫大夫學禮余同鄉友也徃吊焉  
學禮衰麻哀泣稽顙請銘初武庫居諫垣弗能緣  
時俯仰左遷當外補以太宜人年高將力田侍養  
終身焉伏里舍已七越歲屬洪洋趙公撫陝武庫  
舊僚也因勸駕而武庫有難色太宜人覺之曰吾  
兒之不出以我故邪我尚健能隨汝養武庫奉命  
服官政比遷武庫郎中而太宜人日思少女武庫  
急欲告歸而繫籍于公不得遂時相知者又以武

庫資當叙遷可使道待歸武庫朝夕以是慰太宜人太宜人亦雅欲見武庫遷也時吏部方擬武庫補方面而選司以武庫內艱員缺告乃和與歎惜云太宜人姓王氏陝西慶陽之真寧著姓清江提舉司提舉公諱道之女贈奉政大夫兵部武庫司郎中傑公之配也聰惠貞靜甫八歲授以內訓諸篇輒頷悟提舉公特愛之提舉公官清江時翁諱得才以將仕階官南都贈公隨侍蒙後有遠志遂合二家之好云贈公既大度不事家人生業而又廩于庠肆力于學太宜人濟以勤儉故家不告匱

卷六

九

及贈公擯于提學益養浩願真超然自得有遺世之志凡家政小太咸太宜人綜理姑李孺人卧病十餘年侍奉周旋順適無方孺人忘其苦云將仕公李孺人相繼歿襄事皆倚辦太宜人故當時人稱贈公之行飄然若忘機者本太宜人內助之德也初武庫幼時贈公謂太宜人曰是兒性格難馴與其過懲而傷莫若預導之教乃命出就外傳入則太宜人示之以禮夜則口授以句讀又親札影本以課做書武庫君學既通乃脫簪珥爲束修以就明師及武庫中式鄉試登進士入仕籍而太宜人

人又善節理生事家稍裕即留意於周貧濟急云  
女工中饋事事精鑿尤謹內外非至親未嘗接面  
自爲父爲母爲姑未嘗一日或怠贈公旣掄館舍  
武庫勸其勿親家政願養天年惟女工則未嘗暫  
衰曰我有所事事則心安而樂不以爲勞也太宜  
人生於成化十二年八月二十二日卒於嘉靖二  
十五年八月二十一日享年七十有一子男一卽  
武庫娶畱氏贈宜人繼駱氏孫男一女四武庫扶  
柩歸將從葬於贈公之原銘曰母以成子爲慈非  
煦煦吁吁之謂也太宜人於武庫也始教之學終  
命之仕而武庫生得榮祿養病得侍湯藥沒得奉  
治命可謂孝矣皆太宜人成之若其他內則懿行  
固女德之恒也維嘉靖丙午朔吉武庫奉太宜人  
之柩歸於慶之陽爰啓贈公之壙乃窆而藏鬱草  
茂林有崇其崗玄垂朱翔長發其祥

大明南京刑科給事中首山史公墓誌銘

首山子道豐而位儉體達而用阻志士至今心惻  
昔首山子官南都居諫垣也竭節致忠伸志就列  
倏然彈射勿畏高明巧中者指宗室傷之而首  
山子罷蓋正德中也比及天日旣朗心跡已白而

首山子病天下知首山子者日望其愈而興者衆矣乃留連二十餘年而竟不起天於首山子何饒於賦而靳於施邪嗚呼賈生屈于長沙仲淹老于河汾從古則然哉公姓史氏諱魯字宗道號首山子山西平陽蒲之大族也曾祖諱仲謙祖諱全義官考諱臣南陽府經歷封給事中妣馮氏封孺人公幼聰悟初授書讀聲朗朗即通曉大義顧莊雅不同群兒好學不倦雖暑夜且就燈火學既成章而尤精舉子業弘治戊午以尚書魁鄉多士入太學祭酒方石謝公校六館士而公為監元曰與監

卷六

十一

元者性理之學也正德戊辰登進士授鎮江府推官時群閹擅政上下交征吏治多苟且公治其尤者數人而一郡肅清江東訟者皆願之公曰史青天也然又決久寃之獄而人祀其惠寢懷金之謝而眾服其廉裂大宰之刺而人莫干以私三年而政成頌興嘗道交章論薦之曰循良吏也乃擢給事中比當權瑾之後言路久塞公乃以諫議為已任彈射皆當世貴人蓋自吏部尚書而下二十餘人既而又劾叅贊司馬及守備太監曰表裏擅權淫朋也寧藩宸濠逆節已萌人皆知之然濠權術

巧中嬰之者竒禍立至又以離間典重在省在廷  
無敢言者公乃首發其奸曰濠必為變無疑也又  
上疏請省國用以節民財蓋前後二十餘章劉駕  
部讀之曰此切當世之務俊傑之見也會師臣不  
合於幸寧寧嗾稔奸枉狀訐師臣守備太監素善  
稔奸因篡公名于狀曰給事中師臣門下士也遂  
罷歸公素敦孝友事封公孺人終身仁若孺人卒  
卧地枕塊感疾風濕痿痺幾傷生處其弟知縣君  
周情同憂喜人以為難乃又艱關脫封公之難南  
都極迎養之懽生則構堂而奉沒則建祠而祀嘗

卷六

十一

誨諸子曰孝弟者仁之本也未嘗刻意為詩文然  
自典則爾雅雅絕腐脫俗所著有首山集曰學務自  
得文藝末也為人坦夷平易弘人之度素優終身  
未嘗與人有睚眦絕口不言人短不較人惡高知  
州淪貪狼悖德尋常視公及事敗士民盡欲害之  
園園其第公問遺如常淪祈曰知州罪則滔天矣  
奈妻子何惟仁人是望公允其托圖全歸之或以  
為過厚曰犯而不校學者所當師也與人恭雖卑  
賤亦為抗禮曰均是人也初公既里居閉門掃軌  
不事請謁惟與諸生商確義理校勘古今為物我

進修之圖公素不營產業凡俸薪又不入私室歲少歎妻子不免饑寒或鬻田圃具粗糲充腸而已然未嘗有所怨故蒲人曰貞庵之後惟公一人貞庵者蒲產楊少叅也清介慎取與蒲人重之君子曰首山子可謂安貧樂道者也公生於成化癸巳八月二十七日卒于嘉靖己亥五月二十七日享年六十七歲配王氏封孺人先公卒繼吳氏齊氏子男四長資治州學生先卒娶李氏資教鄉進士娶馮氏繼姬氏次資化州學生娶李氏資世聘王氏女六長適王尚忠次適王元從次適庠生楊鏞

卷六

七三

次適庠生傅弘烈次適范學誥次字許敬孫男五女六曾孫女一資教等將以庚子十二月二十五日與王孺人合葬於東原程胡庄之兆資教持狀來問銘銘曰經有之天道福善禍淫首山給舍國士也當其給舍時彈射無所顧忌可謂忠且直矣窮其蘊抱豈歎於古之經世君子哉乃未及五十而病病二十年而沒位不過郎官福不繼於廩祿天果不可謀與首山之子粹美宏碩有首山風殆將興乎經有之積善餘慶天之福首山其慶在嗣邪然則首山未為不伸也首山之陽青青者微有

斐美人終以之歸高原膾膾隴佳者唐魏魏馬鬣  
上有薇生

大明張雲霄墓誌銘

正德己卯四月三日雲霄以瘡卒年五十一卒之  
一日吊者千人焉哭皆盡哀出皆嘆息皆謂雲霄  
善士也其疾若斯其年若斯人又烏用爲善哉嗚  
呼其爲人可知矣雲霄諱鳳字雲霄世爲朝邑大  
慶關人自祖父來以貨雄于關皆素食修讓好施  
樂德鄉里稱積善之家必與張氏云父貞齋諱質  
配郭氏繼配辛氏許氏俱先貞齋卒郭氏生雲霄

卷六

十四

張氏至貞齋尤克光大其世弘治乙丑貞齋卒張  
氏燬於盜置贖產幾盡焚歿者數人雲霄早年個儻  
任放不事家人生業貞齋旣歿又遭家中衰內之  
兄弟外鮮宗親乃痛自刻厲盡反舊好不數年家  
至幾萬金於是睦鄉黨禮親友交納達官貴人張  
氏又大振云雲霄性溫雅終身未嘗與人競人見  
者皆愛重之配褚氏先雲霄卒繼配劉氏子男二  
梧娶蕭氏栢尚幼女二一聘韓仲祥一聘王義皆  
劉所生也雲霄疾爲左搭有瘡百餘孔狀如蜂絡  
治法宜托裏表外清火散毒乃不三日醫顧針破

之令兩人力擁滄鮮血迸出腫應手而起瘡遂大發勢固已危迫又一醫連用牽牛巴豆諸劑利數日而血氣大憊瘡遂內潰不可爲矣蓋二醫者本市井游惰素不通方脉偶隨方外士得一二偏方鄉里小疾幸得效彼遂自以爲能而至此也先是三月十日雲霄來會時尚無恙余告之曰觀雲霄之色憫而怠枯而鮮華疾將作矣歸且慎之雲霄謂陰上舍曰我尚善飯韓公謂何旣而復曰往年韓公謂郭景華景華病月餘今又謂我我其殆哉居五日而疾作又十餘日遂至大故使雲霄因余

卷六

十五

言卽藥於未病旣發卽求良醫付之遽至此哉可哀也已故因誌雲霄並書此以爲謹疾而命醫者之戒書曰天降威罔非惟酒究其極莫非命也夫梧將以是月二十二日葬雲霄於關之西原來問銘銘曰張氏世善之家也雲霄善士也而所遭若此人所憾於天地固如此邪或曰李世之天災祥固難謀矣非邪是邪伯道無後諸曹皆賢幽遠難知有憾也天惟此令名千載有傳

大明處士一菴尚公暨配郭孺人王孺人合

葬墓誌銘

公卒子道余門墻友也捧同邑趙殿試九經狀來問銘公諱秉彝字天性姓尚氏別號一菴山西平陽府夏縣師村里人也曾祖考諱達祖考諱宣父諱釗母孫孺人公幼即敦朴不爲欺誑及長見尚氏中衰也嗣爾股肱幹蠱用譽家以大饒曰不理其家非孝也人而不孝非子也弗孝弗子吾懼之矣吾自食其力豈望而罔之者哉公又以興家莫大於教子命道習舉子業督責之嚴獎掖之愛恩慈義方兩盡之正德丁丑謂道曰而哀然儒華之中而弗能秀也而又弗克於農也其將若之何吾聞苑洛子者授生徒於河西而往從之苑洛子爲熬沉尚書傳義二十卷俾道誦習焉嘉靖丙申遇例冠帶復其家一人有司舉鄉飲固辭不就曰冠帶

卷六

十六

恩詔也以壽吾年八十吾安焉鄉飲大典也以德吾何以堪之壽而靡德古謂之辱不亦羞矣乎人益與其質公年九十殿試往候之至其家僮僕訶訶子姓肅肅公雙目炯然辭氣雍雍步不用杖坐不傾歌雅若儒適若僊殿試曰斯翁也非中畜而外發者乎春秋名鄉賢大夫視其國君諸侯容貌

辭氣吉凶卒不爽即公容止公之福壽命定於天者固多而德將於人者不可誣也公雖敦本不求人知聞然日章自莫能掩云公生於天順二年正月十二日卒於嘉靖二十八年十月初七日享年九十三歲配郭孺人先公卒無出繼配王孺人閑靜女克慎中饋事翁姑處妯娌教子婦撫僮僕上下無間言也生於天順八年五月初十日卒於嘉靖二十八年十二月十八日享年八十六歲夫婦皆享高壽偕老同年而卒亦世之鮮見者也子男一即道以尚書應貢入國學娶田氏繼娶韓氏

卷六

十七

繼娶鄭氏女二長適解輔次適韓哲孫男三長惟勤業農娶盧氏次惟肖業儒娶盧氏次惟馨幼女三曾孫男一篤女二道將以是年十一月十三日合葬公及郭孺人王孺人於村北新阡之兆銘曰內有善外日彰生有善沒則揚公雖聞然有銘章夫婦壽同年亡埋玉處鬱葱蒼垣裁平取公幽堂

大明監察御史楊公墓誌銘

公諱本深字季淵號西村陝之延安膚施縣人也楊氏之先本廬州府人曾祖順隨高伯祖武德將軍駐戍關中爲西安官籍後順將延安覽山川壯

偉愛之徙膚施祖春父威蜀府教授贈奉政大夫  
南京戶部郎中母白氏贈宜人以公兄本源貴也  
公七歲入小學弱冠充府學生有文名癸酉以書  
經魁鄉薦試南宮聞贈公之變奔喪歸未幾宜人  
繼卒公自贈公宜人始卒及虞祔祥禫皆以禮每  
南宮不第輒闔戶讀書曰人事未盡也足不履市  
肆公門乃竟弗第曰命矣乎癸巳謁選吏部授湖  
廣荊州府推官苦節砥行淡泊無異儒生凡訟至  
庭數言即允兩造俱服然後平反數四恐儒者不  
得盡其情也石首奸民佐貪令肆虐歲復饑饉民  
甞然不寧公徃署邑事撫賑之捕奸民抵法四境  
寧肅後新令至歸民渡道泣留一邑傾動時土夷  
叛兵備鄭君氣命公徃撫至則呂其酋長宣布  
朝廷威德諭以順逆禍福群夷聽命他如釋陳顯華  
之枉破王允節之奸士民至今誦說嘉靖戊戌考  
績北上屬官贖餽者不閱封却之太守李公笑謂  
公曰楊公畏四知耶故荆人數清白吏謂鮮與公  
爲儷者已亥擢貴州道監察御史庚子奉  
命巡視京通倉儲去奸剔蠹夙弊頓革凡運領不法  
者論治之辛丑虜大犯山西公條陳設伏禦虜方

畧乃論劾總撫大臣毀櫃之罪

上嘉納之是歲巡按山東見東人勞瘁不忍峻治雖  
憲體甚嚴每以慈惠行之故所歷郡縣民皆安堵  
不擾若無顯貴人臨者惟貪吏則不少假借也壬  
寅得虜牒者云賊欲掠臨清臨清天下水陸之衝  
財貨所聚也乃與都御史曾公會議築羅城是役  
也有生人之道民亦子來不日即工事聞

命銓部候擢京寺仍有白金文幣之錫甲辰再按畿  
輔是秋虜犯紫荆公會撫鎮請

命調軍分布關要虜掠完縣而去乙巳刷卷京畿道

卷六

十九

蓋御史之極選也非資深望重不得與乃丙午四  
月二十四日庚戌無疾正衣冠危坐而逝公友愛  
誠朴李第本潔孤弱撫育成立本潔又卒遺孤甫  
七歲復撫育之愈於己子姊適董氏夫亡家貧二  
子飄泊迎之任奉養焉自生員至末世廉潔自持  
取與不苟世俗紛華亦無所好嘗笑言動必慎矩  
度宴居獨處如對賓客凡接人待物退焉謙抑居  
官所至問民疾苦不設方畛若和樂易與者然持  
法嚴肅人不可犯云銓部將錄公功而超遷之而  
公逝矣公生於成化丁未三月二十六日距卒享

年六十歲配甄氏贈孺人繼配忽氏太守忠之長女封孺人子男二長吉府庠生粹美可成立娶劉氏次兆府庠生娶劉氏女三長字岳某次字恩生馬某次字艾某孫男一女二尚幼吉奉公之樞歸里將卜日以葬以公友兵部郎中傅君狀來問銘銘曰惟士之庶以端百行惟官之庶以立百政抑抑監察冰玉自持爾吏一貪百惡從之一夫橫行萬民何罪非故爾言實妨我惠行憲之風佐府之仁威德時出庶幾斯人

大明大梁驛驛丞張君墓誌銘

卷六

十一

君諱繼宗字述之姓張氏華陰大員里人祖徵以詩經中鄉試授山西興縣儒學訓導封奉政大夫工部都水司郎中祖母陳氏贈宜人父壽剛稜善執疆直不隨以禮記中鄉試初太原為晉故地秦郡縣天下公子王孫皆為編戶而長吏顧其故民心忿不平其俗剛勁勇敢好謀善傾而三晉公族又多至西漢時猶訐告至二千石太原屬邑固皆難治而榆次悍訐特甚其人任俠使氣好勝耻屈長吏稍不平即群聚而排之有陷其身家者不特罷官而已雖銓司亦以為憂壽候銓京邸舍特榆

次令缺同舍生榆人也謂壽曰舍長可吾邑令既而果令榆次同舍生設酒饌候賀壽至大怒曰我爲榆次令生爲榆次人乃敢浸潤我令家人拉之地壽手杖之即徙居他舍治裝令家人荷兩担壽杖而步至保定榆次丞遣夫騎迎壽壽杖却之至榆次申丞不當起夫騎迎令坐之法既視事獲殺人盜賊仗旣明堂階左掘一坑埋盜至有大挺碎其首死擁土爲墳又有不孝子母告之供實令不孝子買一棺來立杖殺之埋堂階右亦爲墳左右纍纍相對曰張知縣不用大明律其法如此自是

卷六

二十一

嚴刑峻法有犯痛治之不少假借榆民股慄饕殮惡草九年一節成化二十二年行取自是榆次始可治初榆次群俠苦壽束縛不敢肆百計搜羅無所得成化庚子鄉試檄壽外簾群俠於赴省必由之途設謀陷之求貌類壽者僞曰知縣輿馬傘蓋夫隸棨戟皆知縣前驅者一人至他縣大家謂主人曰今日榆次縣主至可得密室爲館主人素聞壽名盛饌以俛前驅密曰縣主久清苦今乘此差欲假數日娛樂可備一歌者旣而知縣至主人侍飲至更初從容謂知縣曰其有家樂暫令侑觴

知縣笑曰勿令人知會一人走入擲白金十兩於地曰賞樂趨出知縣追問何人其人遠跪不前曰某里長也急起去知縣笑曰刁弟子明日知縣去主人不知其偽也適壽受巡按檄勘事他邑由他途入省久之俠告里長科銀里長初故不服刑乃言官問科銀何用曰知縣賞樂婦耳按察使疑之又以壽入省未經此途計得其偽狀事乃白俠首捶死窮治其黨壽至京授工部主事歷員外郎郎中工部事涉內府權貴人多干請有權貴人不知壽也托壽爲攪頭地壽對使者大罵手裂其帖曰

卷六

三二

今番且將就再來者我早朝面奏

天子自是無敢請托者人以壽刑人之狀呼爲張扯鑽名聞

孝皇一日

上幸後山壽巡視皇城刑人大內聲徹

御座

上問之左右以張郎中刑人對

上笑曰從渠扯鑽中使或謂壽曰

上在後山壽大叫曰今日是何節令幸此何爲中使驚走郎中六年不調致仕歸母詹氏封宜人君美

髯長身喜修容儀由承差授大梁驛丞大梁爲天下要衝河南行省平章且建治大梁百司分列行於輻輳前後丞往往弗稱使任多罷去驛丞獨無所違失於是遠近多稱說驛丞者亦有黠盜流劫郡縣主盜司弗能禁官民以爲憂道使者言於都院使院使曰吾察群吏獨張驛丞勇敢多智可屬盜事乃有檄檄驛丞果捕獲之又數數得偽印兩院大喜共表薦驛丞能九年致仕歸守臣使得乘傳入關寵異之嘉靖戊子歲大饑君戒家人勿得徵群逋曰此周貧之時也一婦亡金釵君之野獲

卷六

二十三

之亡釵婦覺亡返哭於道君呼婦與釵人稱惠義

云君生于景泰乙亥十一月二十六日卒於嘉靖

己丑十月二十四日享年七十有五配邊氏子男

四長璿生員娶陳氏次璣娶王氏次玉娶石氏璣

玉俱大學生次衡承差娶楊氏女六長適叙州府

知府趙儒次適生員馮時欽次適朝邑縣生員李

聘次適王廷新次適生員史廷謨次適承差潘錡

孫男八女八將以今年十一月二十八日葬于城

東南祖塋之次來問銘銘曰人言華陰張承家居

三十年豈直閭里畏服前後華陰尹崇敬之禮如

顯人不與他承等是必有以致之矣人固貴自立  
非以爵與位言也亦郎中公遺澤之未斬歟

大明登任郎臨汾縣主簿幽齋雷君暨配劉

氏合葬墓誌銘

君余同舍友也資容秀美性質溫雅語言進止循  
循然謙抑而中節與李明經聘相友善同舍生皆  
以遠大期之亦甚愛且重焉君諱復亨字自坤號  
幽齋西安同之朝邑縣西關人也高祖昇昇曇  
曇生時時生覺鄉試中式歷官淮安通判配聶氏  
生君年弱冠補縣學生歷試秋闈不第正德中援

卷六

十四

例入國學國學生亦皆愛重君嘉靖四年授山西  
臨汾縣主簿治易州厥事厥司厚利前後官皆罪  
罷君日夜兢惕翼翼在職三年還治臨汾時境內  
盜黃鍾等劫掠居民聚散無常遠近騷動君設法  
捕之藩臬知君能檄君主盜事盡擒獲藩臬下牲  
幣獎勵邑東有高橋年久塌損行旅病涉君修復  
之邑人立石紀其功佐縣事三四年間臨汾人甚  
安便之而君不能媚上官乃罷歸歸之日民哭送  
之既家食亦惟事田園安日用之常耳配劉氏幽  
閒有婦德繼娶徐氏尤爲貞淑十五年來事君如

賓君病篤焚香誓天願守恒一及君卒喪祭大事皆其經營也君生於成化十四年五月二十三日卒于嘉靖十五年正月十九日享年五十九歲劉孺人生於成化十八年九月二十一日卒于嘉靖元年七月初一日享年四十一歲子男三長儒生先卒次汝震以待君疾亦得疾君服未闋亦卒娶魏氏次汝化聘劉氏皆劉出孫男一子魯將以是年九月二十九日合葬于新塋來問銘銘曰君雖不究於科目文則斐然位雖卑而守職則惟汝賢追昔好而志此期後世之有傳

卷六

二五

大明純齋處士楊公墓誌銘

楊氏之先本華陰人元亂徙朝邑街子里至處士蓋七葉矣而徙祖名字無傳祖耀贈衛經歷祖妣曹氏封太孺人父寅應歲薦為富峪衛經歷三考署上上授徵仕郎陞四川嘉定州同知母李孺人處士名錦字尚綱號純齋性誠篤善恬靜見顯貴人若里之惡少謹避去曰物有所弗合也志有所弗樂也軒然負氣之人孰能為之應哉與物無忤自童及老未嘗至訟庭曰忤則爭爭則訟君子胡爭也鄉鄰有鬪若將浼焉或強質之則為之判白

兩爭皆允曰擾擾焉非居身之珍也昧昧焉非真諒之道也如斯可也有某氏兄弟相惡枉狀其姪死罪群輩皆擗之潛賂處士請共証焉處士弗許曰夫子欲之而以命錦人急之謂何欲因以為利有如天道矣初徵仕宦富峪與嘉定也道路險遠曹太孺人老弗克從處士事之謹曰傷哉吾父之志王事靡盬不遑將母也撫教二子甚嚴少有拂經即正色弗與言二子謝過始解曰吾懼夫嘻嘻之吝霜凝則日烈楊氏立於斯楊氏毀於斯二子其圖之事其允隆友其弟訓導縉驛水夔怡怡然

卷六

二十六

終身不衰曰是帝之明也鞠之哀也敢弗敦與御群僕嚴而有恩曰是亦人子也饑寒休苦弗與人同情哉處士生于天順二年七月十四日卒于嘉靖八年十一月二十四日享年七十有一配劉氏子男二長時雍省祭官文而矩容儀彬彬縉紳之流也娶王氏次時禮壬午舉人粹而立雅而一經明而行舉其將大楊氏者哉娶孟氏繼娶仇氏陳氏女一適本村馬居全孫男二曰瓊曰瑤孫女四一字巖氏一字屈氏一字賈氏一幼時雍兄弟將以明年二月十一日葬處士於陽昌村祖塋左之

新兆來問銘銘曰吾友程君範言處士天資甚美  
言行多暗合論其世信然程君又言嘗觀華陰楊  
氏之族譜謂楊氏漢大尉震之後世次甚詳謂渭  
北有十七房處士族蓋其一乎楊氏之源遠矣

大明光祿寺良醞署署丞李公暨配東孺人

合葬墓誌銘

公諱宗禮字天節姓李氏陝西西安府同州朝邑  
縣嚴伯村人也父政以公官贈光祿寺良醞署署  
丞母常氏贈孺人叔諱本御用監太監

英皇特賜蟒衣玉帶歷

卷六

二十七

憲孝武三朝皆蒙眷遇奏公為嗣公幼習舉子業弱  
冠選充縣學生鄉試不第援例入國學司禮監歷  
事附選給假歸累入鄉試不第謁選吏部授鴻臚  
寺序班朝儀閑習無差尺寸

武皇登極公文正使捧詔之雲南公通敏善交人堂  
官同僚多為延譽序班六年餘選部將擬陞知縣  
公雅不欲出尋陸光祿寺典簿廳錄事公大家故  
克慎取與廳事又皆理堂官薦之部陞本寺良醞  
署署丞三年考績父母獲贈焉御用公年八十餘  
乞致仕

孝皇遣中使送歸私第公事之甚謹御用公喜愛之呼爲四哥而不名御用公卒公營葬事禮儀極其觀美守制三年蕭單二嫂浮坵於都城西門外公擇地葬之初御用公期公必登科目公思承其志聞明師益友必趨講席每應試偕同窓友行路費飲食皆公自備旣入仕招延賓客鄉士大夫有慶餞禮必主之公雖西山之遠必輟公事往從云公生于成化丙戌三月十三日卒于嘉靖甲申八月十九日享年五十九歲配東氏亦以公官封孺人東氏故大家孺人父俊又善經理家事遂以貧維

卷六

二十八

孺人生于成化己丑十二月二十一日卒于嘉靖壬辰正月初二日享年六十三歲子男三長德源援例授府照磨娶韓春桂吾妹也皆先孺人卒側室張氏無子以族子守稱嗣次德澄錦衣冠帶總旗娶夔州府知府劉公孫女皆先孺人卒繼娶王氏側室京張氏無子以堂姪慶祺嗣次德滋先孺人卒娶都轉鹽運司運使華州東公女一適邑庠生王廷祐孫男一即守稱娶東氏慶祺娶蕭氏女年十四真烈飲毒死京張出京張者京師人也夫亡年少尚書苑洛爲之傳曰將不詳書其事烈

女之心無考也將詳書耶甚非烈女之志也推烈女之心寧無書焉庶烈女之心慰矣古今烈女多矣事之難處情之難決如烈女則古今所無也嗚呼傷哉吾之為此一字萬涕矣守稱將以是年十月初十日合葬公及東孺人于祖塋之右來問銘銘曰吾每思公家事嘆惜而求其故不能得也公善士也平生無作一傷害事未嘗有傾擠心公卒時子孫濟濟比孺人卒皆殞滅無存苑洛戶拂衆情而立守稱然後援例而立慶祺不然公已矣因以銘之庶後之君子思而得其理焉

卷六

二十九

大明處士權公暨配党孺人合葬墓誌銘

公卒于朝卿余門墻友也捧吾友王殿試一治狀請誌銘公諱景魁字時仰號質菴姓權氏世爲吾朝邑人先居江家社遷許村後遷八里庄高祖諱秉中曾祖諱士祖諱福父諱祥世皆務本食力母王孺人初權氏以質雄朝邑後稍衰焉公甫弱冠祥公知公之能立也以家政付之公振奮而起不數年權氏復中興八里庄言富族必列權氏公剛稜豪岩里人咸畏服有不當公意者輒示以聲色即其人惶恐不自安必悅公而後已里有爭訟必

質公旣判定無能違者然見人有貧困患難必思周援公嘗曰有親者不可不知醫方書本草不離左右親病自擇藥餌將進必親嘗庄雖數百家俗競藝黍稷遠服賈鮮修文學公獨教朝卿業儒卒以成立暮年有司延為鄉飲賓一預後辭不至曰吾安能以高年僕僕於樽俎之間哉公性勤儉家雖完美且自抱甕視來量入為用曰成之不易保之惟艱也殿試又引吾友廣文劉公罷之言謂公雖不試典籍而質美暗合若高陵大川罷未嘗登其麓涉其波安能測其中之有哉廣文論篤人也

卷六

三十

其言足徵云公生于成化壬辰十二月初三日卒于嘉靖庚戌十一月二十六日享年七十九歲孺人姓党氏亦本邑營田庄名族父澤母史孺人孺人工針刺務績紡納酒醬以供祀事享飪以待賓客奉翁姑孝處妯娌和教朝進等慈而不溺權氏中興孺人有力焉殿試曰女德婦道母儀皆無歎焉生于成化戊子七月十七日卒于嘉靖庚戌二月二十四日享年八十有三子男三長朝用掾士早卒娶張氏次朝進娶蔣氏次即朝卿廩膳生員累應秋試娶張氏女三長適周銘次適高守心

次適高守已孫男四濟經娶王氏寓經聘党氏建  
經未聘明經未聘女二俱未字朝進等將以明年  
辛亥二月二十四日合葬公暨孺人于先塋之次  
銘曰權氏名族世以貴雄旣而中衰振起于公公  
行儆儆剛稜豪宕在數百室誰不敢讓謂孝在醫  
從事岐黃親當有疾湯藥親嘗衆遂未利我敦文  
教彬彬朝鄉邁迹儒校幽閑靜女君子是速母儀  
克盡婦道孔修酒釐烹飪針刺紡績權氏中興孺  
人有力歲富庚戌同年而歸偕老齊眉世之所稀

大明處士任君墓誌銘

卷六

三十一

余爲諸生時君亦充華陰學生因識君於庠舍又  
十餘年而君就隱德又三十年而君卒矣四十年  
間忽忽如昨日嗚呼傷哉初君遣其子令舉人代  
伯來就學且曰昔嘗聽朝邑韓先生說易明且盡  
令人恍然有悟我心慕之汝往從遊焉至是代伯  
持狀來問銘君諱傑字漢臣世爲華州人高祖真  
避元亂來遷居華山之西甕峪口再遷於東里村  
遂家焉直生士中士中生壽官昉昉生耆老鏗鏗  
配袁氏生君資性秀敏年十一選充生員弱冠能  
詩文善楷書三十而名弗耀嘆曰儒冠誤人一至

此矣吾安能鬱鬱與人較藝終身哉遂告歸里舍然誦讀書史終身不怠暇則於居前隙地射鵠爲游息或邀里之善士從容談飲娛樂焉君有雅度性惻隱有宰事才一男子投君就役後盜叔氏金誣君寄藏也君易產償後盜金事白衆喜趨告君亦卒不自明人曰此今之直不疑也里有死不能葬者君出貲以助不足則請同志共襄其事人曰此今之范麥舟也里有斂散衆必歸君則甚平人曰此今之陳孺子也嘗謂代伯曰讀書以四書五經性理子史爲要文以典實繫暢爲美泛博浮逞

卷六

三十一

無益也有司知君累請爲鄉飲賓不就壬寅冬感疾癸卯春復起夏疾再作卒君生於成化戊戌七月初七日卒於嘉靖癸卯六月二十一日享年六十有六配李孺人先君卒代伯自爲之銘納之幽壙云子男四進忠娶王氏進孝娶張氏出承堂叔生員朝嗣代伯娶牟氏繼丁氏甲午舉人代伯娶袁氏生員女三長適王道次適史吉次未笄孫男五簡娶楊氏箴聘史氏笠筓笥俱未聘女七長適承差石汝靜次字史權餘未字曾孫一攘兒進忠等將以本年十一月二十日開母壙合葬焉銘曰

厚其積不獲其伸慶弗於其履於其嗣人悔其名  
利王賀之貞永終吉鬱鬱佳城

大明席君墓誌銘

蒲士秦子克明謁余曰吾蒲有百口同居者席君  
銘也克明義之今旣卒矣敢以狀聞左右夫秦晉  
之俗敝也久矣父母尚存兄弟異產而席君豈易  
得哉可以銘矣君諱銘字克新姓席氏號玉臺山  
西平陽府某縣東靳里人也遠祖

國初戍蒲州守禦千戶所有諱清者始顯名配陳氏  
生秉德配張氏生魁配樊氏生貴配郭氏生祥號

卷六

三十三

竹村配賈氏生君君幼時學舉子業不成又不喜  
農耕曰丈夫苟不能立功名于世抑豈爲汗粒之  
偶不能樹基業于家哉于是歷吳越遊楚魏泛江  
湖懋遷居積起家巨萬金而蒲稱大家必曰南席  
云自是崇義讓悖宗族睦鄰里親友賑貧恤乏解  
紛息訟成人之美納交當世君子雖蒲之州大夫  
所將軍不以行伍衆庶待之而席氏之家聲益振  
孝于親刑于室友于兄弟義以訓子姪故今百口  
同爨無間言無二志臧獲盈庭亦無爭者旣老以  
家事付子日與一二知契杖履山水間優遊閑雅

風度若儒士有司乃延為鄉飲賓初正德中君蓋以竹村之命援例冠帶云君生于成化十七年正月二十九日午時卒于嘉靖二十一年四月二十七日戌時享年六十有三配張氏子一遇春國子生娶張氏繼史氏女六長適文深次適梁志高吳剛王粹俱商人羅鳳梧郭嵐俱州學生孫男二長東聘晉氏次上遇春卜以是年九月葬君于城東石庄村新阡之兆銘曰昔淮陰貧身無策敵人輕之馬援自示其能千金散而復積然則從事于貨殖之嚮者非特以利裕也銘亦州閭之雄傑也哉

卷六

三十四

至於百口同居可謂好禮矣

大明外孫廬膳生員南陽張士榮墓誌銘

吾尚忍銘吾孫哉舉筆輒肝腸寸裂然吾孫隱而未見蓄而未泄孰能詳哉古人謂一字一涕吾為是銘一字千涕且萬涕矣吾孫姓張氏諱士榮字仁亨號南陽世為關內馮翊朝邑陽村人後其父徙寺後社南陽者吾里名也吾孫生于南陽長于南陽學於南陽且置庄于南陽將卜築焉未卒前五十日病亟其母始携之歸寺後然朝夕猶取南陽水飲食之蓋自落地至歸直皆南陽也號南陽

者不忘南陽也不忘南陽不忘吾也死者有知神  
其在南陽乎此吾所以哀痛之無已也吾豈不達  
死生之故哉高祖諱藝配雷氏曾祖諱軌配王氏  
祖諱瀚配蕭氏父騰蛟累應秋試充歲貢母吾女  
外祖吾叅贊機務尚書外祖母張淑人吾孫幼有  
至性三歲時見庭前舞者屏後側身効之見吾拊  
琴歸以兩手作勢告其母曰爺爺如此吾聞之嘆  
曰此孟母所以三遷也九歲時讀尚書至璿璣玉  
衡章蔡傳引張衡渾天儀說吾曰此書舉子多不  
讀吾孫曰安有書而不讀者乎吾授之明日再授

卷六

三十五

不肯過吾恐其幼不能悟命姑讀過泣三日曰我  
不知如何過吾試告之吾孫卽以竹篾叢筒爲一  
儀象以呈吾大奇之以是知前此所讀書皆知其  
義矣十三四時卽暢達三場文字侍吾遠宦於外  
不及就秋試嘉靖己亥年十七提學龔葵齋取應  
秋試乙巳吾在吏部問吾孫致太平之道對曰今  
之舉子業與前代不同五經四書傳註皆

祖宗之制律例者國之成憲今庠序之士爲文不詳  
傳註郡縣之吏治獄不依律例昔周王訓官曰其  
爾典常作之師

祖宗制度尚違越如此况望其學古議事者乎欲致  
太平必先正此二者蓋致天下之治者在郡縣之  
吏而他日爲吏者皆庠序之士也吾與一厚俸贊  
美一大臣吾孫於屏後聽之客去謂吾曰適聞所  
論兒殊未諭大臣與宦官不同言官遇有

朝廷缺失卽當言大臣審其必能見納然後可言若  
明知其不能行身徒殫竄自取虛名使

朝廷添一過舉四海加一瘡痍非大臣忠愛之實也  
吾曰然則如之何孫曰以道事君不可則止吾他  
日以二事告契僚大驚曰此豈尋常舉子之見哉

卷六

卷六

丙午吾淑人病孫朝夕待湯藥善命應秋試不肯  
行屢促之不從吾怒治裝縞屨遣之明日孫跪曰  
兒今陳情吾曰陳何情孫曰祖母病矣而欲從事  
於功名得失孰輕孰重哉晉天子異代之君李密  
逋播之臣密尚得陳情養祖母今爺爺不容孫子  
陳情何也伏地痛哭吾亦泣姑允之淑人病亟孫  
哀號呼天計無所出割股肉爲羹以進又嘗所出  
否及淑人卒孫哀踰禮旣殯始應秋試不第回  
扶柩歸京師至吾家三千里冬寒孫露卧柩傍旣  
葬廬紵禫禫考古禮行義服三年初吾自撫晉陽

歸視檣感厲疾坐于廳命孫召淑人語對曰祖可  
入祖母不可出吾曰我病不能孫驚仆于地口鼻  
出血左右扶起入告淑人淑人聞其言見其狀亦  
驚仆孫出視其祖入視其祖母往來號呼不覺披  
髮徒跣淚血滿膺食頃吾蘇衆為束髮顏面孫曰  
真愈邪安我邪吾曰取粥來孫喜見顏面然痛定  
思痛淚下如雨紫陽弟曰今日違違惟士榮耳預  
營葬地於吾墓之側曰異日身後以便服動於地  
下云已酉病不終殤庚戌病亟吾悲泣孫正色曰  
死生有命既而曰天下事未可知借言死生尚未

卷六

三七

定止吾悲也至卒井井不亂嗚呼吾孫遽至是耶  
痛哉痛哉吾孫事父母孝而有道母不喜飲酒終  
身不近壺觴祀不飲福歷覽群書尤精于蔡子壁  
經及朱子周易占于凡律曆天度樂器龜卜方藥  
之屬皆究其樞要遠識宏見出人意表有經理之  
才事無巨細處之能當其則沉機應變淵深莫測  
善用自牖遇卷之謀故行無不利而少沮逆然動  
必以理論必以正無或拂經焉吾意其必為國家  
宣力乃竟止于是也惜哉惜哉吾孫生于嘉靖甲  
申六月初八日卒於嘉靖辛亥正月十一日得年

二十有八配趙氏繼李氏男一可賢未聘女一字  
生員許三畏長子爾立銘曰吾孫既沒渭北趙先  
生以書來吊曰張子士林仰重德性閑雅漢之黃  
憲未或先焉哀傷之過宜有之矣讀斯言也吾孫  
庶自慰於地下乎悠悠蒼天謂之何哉胡奪爾年  
胡富爾才胡富爾才胡奪爾年謂之何哉悠悠蒼  
天

大明王安人墓誌銘

予述提刑孫大夫王安人狀流涕閣筆者數肆傷  
哉春風不見桃李實欲養而不逮古人所以深悲

卷六

三十八

哀嘆也安人當王氏中衰以閨房弱質舉王氏一  
門烏獲之任憂勤勞悴年五十餘尚未亨利竟殞  
歿焉後十三年而子太守君崇古登大科又三年  
太守君以刑部主事蒙覃

恩贈安人勅曰以孝睦為令婦以愛勞為慈母遺澤  
有加而榮養不逮良可悼也孫大夫曰綸綽煥然  
足光閭德謂非天錫之報耶古人謂天道雖悠遠  
而終不僭信夫安人姓孫氏封刑部主事素菴王  
公元配也蒲清白著姓父諱某號坦菴時稱長者  
母王孺人安人生而閑慧柔嘉少與諸姊妹從孫

姑馮孺人居靜默無競温然自淑馮教以女工鍼  
爾慕組輒盡馮巧而又時或過之馮甚喜愛謂王  
孺人曰是兒幽良妙麗必為人家內則也長歸素  
菴公事翁姑孝處妯娌和視素菴弟妹若同胞翁  
敬齋公授鄧州訓導旅資不給安人脫簪珥充費  
奉姑張孺人同至任敬齋公遷魯山教諭兩任歷  
十二年敬齋公有士望遠近樂于交游素菴公曰  
召工匠製噐用安人既無妯娌又乏婢僕晝則外  
應賓客樽俎工食內供翁姑羞膳夜則治諸子衣  
履備極苦辛張孺人每憐念之安人久益竭力故  
敬齋公得樂于冷宦素菴公得專意貨殖而安人  
疾作矣敬齋公致仕歸安人久違父母暨獲見益  
增悲感然無一言述其勞翁姑乃數數言之戚黨  
以贊其賢小姑景孺人少折遺孤甥方在抱姑素  
鍾愛小姑哭不已安人亦有女在抱取孤甥同乳  
之而愛護有加以慰姑哀思家口既衆情性靡一  
又無蓄積素菴公經營四方每數年始一歸中間  
坎珂拂抑人所不堪安人順受之雖素菴公亦不  
盡聞素菴得以保和兄弟終始無間者安人內助  
有力焉敬齋公暮年多病損食安人每饗殮極其

謹潔惟恐不當意聞少餒即喜動顏色張孺人久病痺不能舉手安人親為理髮足病瘡每痛發安人以手砥摩張孺人每對人言其孝勞輒至泣下父母相繼卒安人雖哀痛特甚而不廢翁姑之禮翁姑相繼卒安人相素菴公襄事虔祔禪祀必馨潔安人痛姑之歿數謂嫂氏言每憶從事三十年間居家隨宦備極窘瘁輒啜啜不能語或夢姑呼其理髮痛哭失聲事素菴公終身順正素菴公亦禮重如賓性本勤儉素親課諸子讀書不令少逸有過必聲其狀責治之衣令蔽體食令充腸

卷六

四十

而已見家人溺愛者曰非兒女之福也諸女皆命先讀孝經曉其文義而後及女工中饋童子婦特慈未嘗少令知勞每憂長子崇義未嗣後育一孫疹發安人驚悸疾益而卒時太守君未冠諸女在閨素菴公又商于外親戚內外罔不悲嘆曰耕而未食蚕而未衣可哀也已安人生于成化丁酉十二月十九日酉時卒于嘉靖丁亥十二月二十六日未時享年五十二歲崇義等將以嘉靖辛亥十一月十二日啓安人之壙與素菴公合葬焉嗣世詳具素菴公誌茲不再書銘曰蒲有叔女君子儷

之威如交變式昭母儀一身之微當王氏哀劬勞  
盡瘁卒瘞自持天道明明爾嗣穀穀爾德孔那受  
天之祿王氏赫赫寔爾之福爾積爾遺如岳如瀆  
食不三牲祀陳五鼎鶴表興悲龍章錫寵松楸蒼  
蒼高塚壘壘他年太史為寫宸碑

苑洛集卷之六

卷六

四十一

蒼高塚壘壘他年太史為寫宸碑

食不三牲祀陳五鼎鶴表興悲龍章錫寵松楸蒼

天之祿王氏赫赫寔爾之福爾積爾遺如岳如瀆

盡瘁卒瘞自持天道明明爾嗣穀穀爾德孔那受

之威如交變式昭母儀一身之微當王氏哀劬勞



